

芙蓉山館全集

芙蓉山館文鈔卷七

金匱楊芳燦蓉裳著

大宗伯紀曉嵐先生八十壽序

懿夫官職與聲名並重而才如賈董位不躋於蕭張辭章與經術殊途或文似班揚學多慚於服鄭其有盛名兼擅碩福兩隆推當代之宗工爲衆流之淵鏡威儀象緯則度叶珠繩潤色經猷則品尊玉瓚荷天之寵鳳翮播其輝華戴斗之稱龍門高其譽望禮堂簡策寫定羣經之文芸閣篇章編成一品之集如我大宗伯曉嵐先生者洵無愧焉先生濟北名門河閒望族世有隱德代產聞人簪纓繼武座分雲母之屏翰墨傳家饒有青

鏤之管先生幼而開敏長更徇通赤文綠字一覽無遺縹帙綳
緹五行俱下振奇於橫經之歲揜雅於選雋之場固已望氣咸
驚含香漸越矣嗣登上第益廣方聞黼藻九流琴箏五典金繩
鏐檢探宛委之名山玉緯瓊綱守庸成之秘府証易中之九事
手握神蓍坐帝後之七車胸羅元象上奇木白麟之對辨騶吾
廳鼠之名張茂先之洽聞三十餘乘鄭夾漈之博物五十八籤
莫不竟委窮源望表知裏球圖法物問承天而必知典冊高文
待元成而始定其學問之該洽有如此者然使李善淹通僅稱
書籠裴遐博綜第號談林勤重遇之三餘徒工隸事賦劉晝之
六合詎足動人未免爭鳬鶴之短長較素綯之優絀先生則詞

源濤湧筆陣雲霧龍翰鳳雛金淵玉海藝林耀辯折鉤鬚丁尾
之談禁苑摛文軼山柱河官之作嘉禾神雀頌成而 帝賞其
工仙露卿煙詩就而羣驚其麗開函香氣瓊臺之花萼千重拂
紙光芒金谷之珊瑚七尺揮翰所及俱作雲霞之文頽硯之餘
尙成睢渙之色其文章之華貴有如此者夫寶登延閣光采耀
其喬皇樹入華林枝條蔚其膏茂向使張衡碩學久滯日官馬
卿異才僅爲園令亦不足吐凌雲之氣表靈憲之奇先生則翔
步霞高廣颺日近仙人入宦東觀比於蓬山太史占星文昌統
夫上相班序早歲卽涉清資安上一生未離朵殿山虎澤龍之
節五雀六燕之平文運提衡士流圭臬遂乃再登槐序五入栢

臺鑿重真清榮專獨坐道侔風力屢爲黃帝侍中學並彭聃台
作周家柱史尙書迺天之喉舌秩宗爲國之羽儀其官閥之
清要有如此者且夫中天紀運生其間者福自隆上聖應期
際其盛者道自合當泰始成鳩之歲初元紀鳳之年惟授
受之上儀實堪挺所罕覩先生則職司禮闈儀掌容臺親承
堯舜之諮詢手定夷夔之典物凡夫雲門鍾管衛室舞章莫
不成誦在心應答如響至於百神薦祉五老來朝八方之壽域
宏開萬國之耆英式宴先生兩陪嘉禮盛被殊恩香惹祥煙
果懷珍核繡囊文綺錫賚出於尙方珠字銀毫歌詠傳爲故
事接雲天之燕樂瞻日月之光華其遭逢之隆盛有如此者昔

班固史才首勛藝文之志黃香博士徧讀中秘之書以至劉子
駿之七略荀公曾之四部王仲寶搜羅散佚阮孝緒掇拾叢殘
皆未窺典籍之鉅觀敢謂極編摩之能事我朝儀璘敢耀奎
璧騰精開四庫之崇閣括千秋之著作先生欽承 睿命倍竭
精思寢抱縑緗行提鉛槧陳農奉使竹素咸收公玉呈圖琳琅
備列然藜達旦削牘窮年鉤元提要實總其成合璧聯珠於斯
爲盛其仰文光之朗照頻聞 天語之褒嘉茲復觀令典之會
通輯 朝廷之掌故宣揚美備典謨訓誥之文記載詳明禮樂
兵農之事 帝眷已徵於歷試公才本備夫三長其編纂之宏
通有如此者猶復激揚聲律杼軸襟靈高文揚星漢之華秀句

得江山之助時或著十洲之記發五總之函偶寄閒情歸之副
墨西山大小並富藏書譙舍冬春從無釋卷惠施好辯偶爲連
牀之詞匡鼎說詩閒作俳諧之語黃車逸事著錄成帷紫宙異
聞流談若海洵足儷謨觴之秘笈詎止匹猗玗之隱書其著撰
之淹雅有如此者維弦六月之吉爲公八秩之辰元氣調化如
春之溫景風扇和能夏則大蘭階集綵荷沼舒華承湛露於
楓宸蔭祥雲於珂里玳筵錦畫珠履塵宵羨純嘏之方臻識遐
齡之未艾某等曾陪杖履俯荷陶鈞忝隨編錄之班幸預校讐
之末竊喜樽前投簡無殊座下傳衣仰大手之鴻裁慶高門之
燕譽窺養氣立言之旨道在則尊識培基積福之原德成者上

登堂祝嘏揚解陳詞義不取諛言皆徵實此日金檄一曲聊佐
黃封介壽之觴他時銀管千枝更紀紫閣調元之績

彭雲楣師暨師母夫人七十壽序

蓋聞六億垂象文昌連太紫之宮八柱承穹華蓋近中黃之域
篤生膏碩用贊隆平是以崧嶽降神申作周翰傳嚴寶弼說爲
商霖璇衡政齊奇麗之士斯輔玉版圖啟明允之佐用光使非
瑤璣誕靈銑社毓德其何以經緯懋典訏謨大廷至於慶吉耜
之齊年登康時之上壽五臚來備百祥有徵外修內塑克濟其
美我黻子佩其愛其榮信惠迪之有基知建福之不爽矣我老
夫子大人鍾天之閒氣爲國之寶臣靈珠之輝吐於神澤黃

齒之誕俟於慶霄徐僕射目有青睛知爲慧相沈家令腰橫赤
志卽是文星早掇巍科泮登清秩敷非烟之藻恩拔叢雲之奧
辭珥筆螭坳備堯韭舜冠之對含香鬣禁上河官山柱之文選
乃受 九乾特達之知領中朝著作之任昇大手筆推第一人
簪冕班行丹青神化時或獻金天之頌廣卿雲之歌輒落簡冊
飛濡毫立就至若玉檢金繩之典冊黃緋紫綵之制詞亦復步
淮南食時之工同仲宣夙構之敏聆乙夜之 天語近九英之
日光每謂鈎軸調元丙魏之文章之望樞庭視草枚馬非宰輔
之材方之於公彼誠多愧夫子機神警悟體質貞明察金奏而
識微端玉容而領度其敷歷於六官也則本巨源之識量兼懷

慎之公勤其典司夫二試也則勵敬興之清操秉歐陽之藻鑑
其論思之密勿也則條平津之十策進衛公之六箴其編纂之
宏通也則軼中壘之七略該公曾之四部當

太上垂衣之歲迨

今皇秉籙之辰 眷顧不遺倚任彌重太保列公孤之右司空
居岳牧之先海內繫心蒼生延首瞻六符之光耀卜三能之色
齊卽贊綸扉復登揆席此真歸昌節足協幡籙以呈祥元扈鏘
翺望羽旄而頌吉者也猶復搜才路廣揖客門寬持衡於常羊
之維薦士如閼奕之隸姬公握髮以出而還贊三千孫叔散牖
不收而傾襟七十身爲大匠千尋收集鳳之枝手鼓神鍾萬斛

鑄函牛之鼎一奉顧盼龍門若登凡所吹噓駿價始貴豈非萬
流之淵鏡庶士之楷模歟況乎陳仲弓之內行聿修柳公綽之
家風最肅晏嬰之祿待舉火者萬家陰慶之罔執義讓者數世
閨房雍睦少長恬愉成君子之大名識質媛之內助蓋我師母
夫人蘊華珂里儷德名門孝敬篤於稱幃淑慎式於宗祢和順
洽於嫺戚慈惠逮於嫠嫗不侈并珈襍飾之榮時親綺筵蘋蘩
之事吉人心小祇謹柔儀華閣望高不形矜色每勞謙而自勸
信積厚以流光盈階之琪樹呈華繞膝之鵷雛綯采舉錦堂之
案華首相莊捧綺席之鴈斑衣成列可謂情隨性善福與慧兼
者矣茲者季秋開蓬島之樽小春展麥邱之祝方輝可觀葛鮑

怡顏園景常盈劉樊介祉香散沈榆之屑吹遍蓬壺風生寶鬘
之雲霞來闔苑伯雅季雅飛四座之霞杯大驚少鷗集三山之
青鳥玳筵錦畫珠履塵霄羨純嘏之方臻識遐齡之未艾某等
里過通德閣侍延英曾備聆王文正之謀猷非敢傳范滂之
衣鉢撰杖康成座側執經韋母幃前陶鑄恩深景行念切效擎
拳而鞠脰敬述德以抒情擷威喜之華芝採壽榮之仙草許聽
後堂絲竹奏山愧非鸞鳳之音幸探大雅淵源摛辭敢竭麒麟
之筆

陳汾川先生暨查太孺人雙壽序

蓋聞隱德俟天積愛者福之府修心逢吉達生者壽之符是以

定性於大湫識大氣之清罔也和神於景風知萬物之允爾也
若夫應歲星而度世含神霧以葆真外修內型嘉瑞斯集崇情
遠迹靈貺自甄故無事薰修之習而齒積陀移不煩導引之方
而年齊旗翼矣汾川先生浙西高門宇內奇士圭璋植品模繡
範躬偕其德配查太孺人慕鹿門之風爲臯廡之隱潁川家法
不媿前修元方高名成於內行某與哲嗣雲伯訂縞紵之契聯
雲霞之交吐珠於澤上溯璇源結桂在山仰挹靈蔭文章瓌麗
知枚乘之傳臯經史紛綸羨班昭之授穀共數晨夕悉其家庭
而歎夫襲慶有基鍾祥非偶也先生懷橘抱柰孝本天情浣滌
捧竿性非外獎季江仲海誼篤於連枝末婢胡奴愛均於猶子

汜勝之宅衣無常主董陽之間爨無異煙其至性也如此迺若
志願奢於廣廈然諾重於岑鼎鬻車牛而拯急操釜鼓而周飢
信臣臣以慕賢非貧貧而妄振養苑枯於時雨均貴賤於條風
歎汲廉泉居隣慈潤其篤義也如此遂乃識輪椎之分定屏筵
尊而何卜執謙柄而作退母守靜根而爲躁君書仲長樂志之
篇著陽固演蹟之賦含經味道人推白學先生種蔬灌園自號
朱方隱者其達識也如此于是偕齊牟之淑儷攜投畚之賢妻
舉案相敬則藜藿皆甘下牀荅拜而縞綦自樂幼興具邱壑之
致次宗好林澤之遊諮穀稼于閭丈人同保社于鄉祭酒其高
致也如此雲伯識該三微學貫九變炳然龍豹之穎暉如孔鸞

之儀本傳家之庭誥作諭蒙之治譜求官養志捧檄娛親蒲輪之迓從以版輿蘭陔之章聞以華黍洵人倫之盛事里黨之美談矣茲者戒裝京國占鳧舄之飛衣繡鄉園介鳩筮之祉槐榆昆季椒蘭友朋共驛衷衿敬申祝嘏幅巾他日定拜華堂俱歸今晨各攜柔翰

張偉葇處士壽序

懿夫仁知之性樂壽效其崇深天人之際瀟漓別其修短觀於竹箭駛湍而迴波以綿遠自逸飄輪迅往而條風以長養自培是知美意即可延年積愛斯能成福昔人謂琅書斗檢畸士之華說熊經鳥伸齊物之寓言祝嘏之義雖埒於經而頌美之文

不登於集良由高語所淪之齒侈言旗翼之齡徒騁夸辭無關
實行也偉莽處士抱瀟灑之德安樸素之風邪卿處困適作餅
師僧珍食貧常居蔥肆獨行之傳聞合前修長者之風矜式同
里其令子鵬翼受業於余夙負振奇之才可充方聞之賦諗彼
淵懿詢其稟承而知處士之不可及者厥有五焉夫不建浣囊
黃香扇枕袖懷公紀之橘饌供季偉之雞百末稱觴思柔進酒
南陔肄雅華潔歛笙是皆樂子舍之優閒欣養堂之安愈處士
則蓬藿不蔽糠粃自甘而能使庭闈之滌瀟常豐晨夕之饗殮
不闕融怡孺子之慕瀟至古人之風此其不可及者一也夫幽
贊所及白駒維谷惠風所被枯木生蕢朱家郭解交朋通其有

無穉季君卿閭黨通其緩急此其人原任俠家本不貧處士則
辟蘿被屋有杜陵廣廈之思雨雪載塗作白傅長裘之想益無
儲粟待以舉火者數家鎧有贖膏借其餘光者徹曙此其不可
及者二也李仲元化行鄉閭汜稚春施及邱里霍原以公力服
物而氓俗歸仁郭泰以盛德董眾而凶慝改行此其人皆負雷
合之重望馳九牧之大名故教化易行而風猷遂遠處士則伏
處蓬蒿混迹閭閻而能使穿窬夜客越境潛蹤栗栗少年聞風
斂手盜牛者遙羞王烈失脯者自愧桑榆此其不可及者三也
又聞船工某竊處士稻有告者處士隱之或以僞銀償直旁人
愆戾發其奸處士棄銀而寢其事隣士認履孝緒焚車王恠任

繡被之隨風張稷笑銀杯之羽化文饒雅量叔度寬中洵可以
激薄停澆歸真返樸此其不可及者四也夫祖德能傳續學捧
范高之硯宗風克紹通經發韋氏之籀受金鑽之楹書藏珠囊
之庭誥是皆上承先蔭下取後昆處士則世是壙僚門無樸學
孤同孟陋但擁牛衣貧似文休惟資馬磨迺能延名師而課讀
勗兒輩以勤書銅槃具遵彥之餐嘉樹爲憲之而種二子鵬翼
鳳翼俱擅博通之學挺秀穎之姿篤志綃紉蜚聲黌序瓜鎮心
而並勵炷瘁掌以同劬行見龍文虎脊籙雲霞而上馳虬鏐蛟
鰲貫星虹而並耀此其不可及者五也叢華旣微定臻胡膏賁
五履二騰書其潛美絲三竹四軒鬯其歡聲不使暮氣之和乘

常守曙戒而勿怠惟謏躬之介介自後福以貞貞隱德自知夜
行獨有姱修之美稱述非誣紀實之詞揆張勿尙聊侑手仇之
爵用伸心企之忱

峽口禹廟碑

原夫統系承於五帝敷土之烈獨隆隨刊徧於九州鬻河之功
最大蓋溯陽紆之巨派探板桐之遙源枝流之并千渠懸水之
高萬仞噓吸則轉旋星宿蓄洩則鼓蕩雷風而龍門未開呂梁
尙阻元氣滯濯百脉沸騰異聚灰之可堙豈捧土之能塞使非
神奇特起聖睿挺生何以奠壙疆之黃輿拯沈菑之赤子乎溯
自石紐降精玉斗表貺幹父之蠱分帝之憂靈龜呈括象之圖

神龍獻導川之畫丈人之稱九嶷將軍之號百蟲五伯宣力八
神受命咸稟指麾而助順並宣勞勩以奏功遂使蘊蒲之地悉
返耕桑巢窟之氓盡登衽席非天下之至神其孰能與於此峽
口者黃流之險阨紫塞之巨防也舊稱銅口亦曰青山岩巖對
峙似重樓之百常突兀相望倬闕之雙起奔湍爲之縛束碻
石爲之壑落下通伊闕旁帶流沙窅崖闕鳥獸之門駭水集蛟
鼉之窟上有禹廟由來已久飛欄虛構淨柱相承象設崇嚴儀
衛森列所以資呵護安神靈也或者謂神功廣運靈蹟遐宣是
以東造絕迹西延積石南逾赤岸北達寒門降雲華於清都鎮
支祈於惡浪夷岳封青泥之檢洮水受黑玉之書其知九野之

平成何待一方之尸祝祀典得無近褻明神方且弗歆殊不知其用力深者其感人也遠觀洪濶之湍悍識底定之艱難疏鑿居四瀆之先勤勞分九載之半胼手胝足績川最多馭氣乘風魂魄猶睠曩日北阿之享歸成功於上穹今茲朔塞之祠垂明禋於萬禩亦民之不忘舊德也而何疑哉惟是丹青歲久霜露年侵棟幹庸庖菜膺彫剝徒襲卑宮之舊未抒崇德之忱制府福嘉男公因巡閱之餘行朝謁之禮憫摧殘之浩構察隱憐之餘基鳩工庀材凝土度木測景經始尅日蒞功金鑄承雲璇題納月千尋桂柱峙鼉背以巍峩百尺梅梁化龍鱗而飛動冕旒肅穆寶光騰宛委之圭椒蔭氤氲香氣覆昆吾之鼎將鐫樂石

遠命鯁生知聖德之莫名如天容之難繪探秘文於岳瀆敢摹
峭屢之碑固淺見於方隅僅紀崑崙之派云爾

靈州移建太平寺碑

原夫禮鎗王於石室須陟名山謁梵帝於香城先尋福地丹崖
峯嶽識檀特之高峯碧嶂寵從仰耆闍之峻嶽千巖踰險百棋
憑虛發雲構於自然極神功之不測是以簡栖頭陀之頌蘭成
麥積之銘佐公天光之碑于昇平陵之石莫不寫林霞之奇秀
狀巖壑之幽深遂使鵝殿增輝龍宮長價勅翠珉而不傲標白
甍以長新若乃寶地迫於羣塵靈境局於平壤築昆侖之土不
過三成開般若之堂無逾十笏縱爲極筆徒事華辭何足以照

燭人天發揮龍象然而法惟平等甯隨夫偏隅教推廣大不遺
於荒徼憑五乘以導迷途宏六度而濟塵劫在有心者能無述
焉惟靈武之故城卽河奇之舊苑沙瀾匝地東接楊榆之關河
流帶天西連雞鹿之塞爰有梵刹近峙亭臯雖岡巒乏隱嶙之
奇而川原有奧衍之勢徒觀其靈宮四柱祇樹雙林星毫月面
供寶相之莊嚴珠網銀繩護蓮臺之香妙百枝鎿影光搖怯夜
之旛九乳鐘音響蒼占風之鐸崇軒閒出層構相承已足壯紫
塞之觀瞻作青郊之屏障矣矧夫闢微妙之法藏具調御之神
通流傳沙界諷光音之經震動風輪建塗毒之鼓雪山吹藥慧
伏衆魔苦海淨航慈濟羣品俾螽蟥之土俗共結勝因率剽悍

之人風爭趨善果詎非象教之宏誘法王之神化歟方今遐邇
又安中外禔福種人內嚮裔土永甯七政均明躋蒼生於曼壽
三階齊色慶豐年之樂康見瑞星雲降甘露雨此太平寺之所
由名也是則嘉禾合穎詎讓苾芻之芬密樹垂陰卽是菩提之
彩元鬕黃髮俱遊釋梵入宮野菽溪毛如饜祇洹法供又何必
訪戴民之國登化人之臺求鷲窟之淨居企鹿野之華苑也哉
惟是舊基卑溼流潦浸淫高欄岌以將傾繚垣隳而不直苔侵
玉座雨壞寶衣奔流深黑非關劫燒之餘驚沙坐飛似集微塵
之衆余職司守土慙然於心爰出俸金以倡善信更命僧心福
募之四境以廣檀施鳩工庀材凝土度木去故址三百餘步築

平臺二十餘丈雕甍映日鵬翼將翺翠瓦排雲魚鱗欲動寶龜
忽徙疑初利之飛來紺宇潛移肖化城之涌出是役也檀行臆
趨役徒腐至闢三空之勝境收七華之妙覽分菴羅之淨土樹
堅固之貞林諸天則藉以閑安法侶亦此焉遊集某未通釋典
摛寫葉之元詞夙慕禪宗喻貫華之微旨非云宣揚正覺於以
歌詠太平銘曰

靈郊淨域朔塞香林松關左闢菌閣斜臨近帶華薄旁連碧濤
圓鏡四照洪鐘一音持戒定慧閱去來今丹青歲古霜露年深
隄衝蟻穴潦集牛涔銀樞侈剡珠宇銷沈金容雨立瑞象塵侵
萬善咸起衆力克任康時胥樂至教同欽手雨七寶掌出雙金

層臺駢麗塢寄崑影藏怖鵲樂應靈禽花雨灑落松風嘯吟
懸日夜朗慈雲晝陰定香沍沍靜梵愔愔早耽白業敢闕清襟
憑廣長舌寫妙明心真如不住了義難尋

辭授朝議大夫湖南沅州府知府吳松厓先生墓碑

夫惠能及物者方金石而彌壽文足傳後者比桂椒而信芳有
鸞鳳之采性自異於鷹鷂具騷雅之才識早遠乎刀筆是以倪
寬本經義而奏獄詞任延以儒術而飾吏治文章政事道本同
原循吏儒林美能並擅如我松厓先生者斯其人矣先生諱鎮
字信辰號松厓甘肅狄道人韋少翁五世壙僚汜稚春一門篤
行載在家牒協於鄉評先生幼秉異姿弱遭偏露未承過庭之

訓空留鑿楹之書魏太恭人育而教之然糠照讀截蒲作編追
涼蔭以移牀隨月光而升屋子雲沈默雅好元言春卿蘊藉深
明經術方聞日廣時譽斯歸十七補博士弟子員辛酉選貢成
均老宿傾襟儕流歛手讀士衡之賦君苗硯焚兒希逸之文陽
源筆閣時山左名宿牛真谷先生作令平番因從遊焉傳紉席
之言授禮堂之簡河汾弟子雅重薛收東京學堂獨尊庾乘庚
午舉於鄉先後赴禮闈者八而六薦未售庚辰大挑二等以教
職用初選耀州學正再授韓城教諭明山賓屢作學官元行冲
願爲都講含經味道折菱燐枯先生怡然自得也旣迺幕府交
推剡章特薦謂先生才足以膺繁望德足以撫華離引見授

山東陵縣知縣解巾赴郡露冕班春種桑百枝拔薤一本撤唐
邑之箝替蠹吏唱名稅顏斐之薪爲諸生炙硯竿牘稍閒不忘
細索撫綏有術尤愛文儒下教而子遠踵門側席而龍邱備錄
民依若母士奉爲師甲午歲壽張王倫作逆先生解馬至夏津
大府飭在營諸州縣窮治餘黨先生察其迫脅株累者請之大
府全活者數百人楚獄無濫賴寒朗之寬平廣陵獲全服張綱
之膽勇神犀自秉光燭覆盆亂羊旣除風清貫索數其陰德蓋
非尠也嗣因獲鄰邑盜犯保薦擢湖北興國州知州先生秉小
駟以巡鄉衣布袍而問俗洞知民隱不發私書電掃訟庭曾無
積牘庚桑入楚風移畏壘之民子香治荆德感枝江之虎鄰邑

民爲鄉豪所殺以自縊立案經其子上控大府檄先生治之虛
衷訛鞠悉得其情正不必設鉤置距鬪智翹明卒能使孤弱氣
伸豪強膽落神君之頌旁邑同聲循吏之稱上官動色委解京
餉回任卽奉 旨特擢湖南沅州府知府歌傳于蓀名記王邱
超越非因歲巡除拜悉從中出先生潔清勵已慈惠字人但飲
廉泉不然官燭吳祐之竹書兼兩猶恐生疑范岫之牙管一雙
尙嫌其費美俗致中牟之雉勸耕買渤海之牛戶息懷軼人皆
挾槩廣微之霖雨自足房豹之并泉皆甘古所稱良二千石者
先生足以當之矣嗣因失察屬縣諱盜爲竊之案竟議落職邵
公不肯錮吏張叔未嘗按人觀過知仁士論黷之或勸先生委

蛇其道冀復職者先生曰吾精力就衰久思田里得以微罪行
幸矣又何求乎聽鼓者方挽鄧攸卧轍者爭留侯霸而先生乃
單車就道襪被戒行誦樂志之篇尋遂初之賦隱之裝儉但有
琴書元亮園蕪惟餘松菊枕圖荏苒相羊翰墨之場抱德煬和
韜晦邱園之迹登山蠟屐對酒漉巾縱釜甑生塵樵蘇不爨不
以屑意也乙巳歲使相福嘉男公耳先生名延主蘭山書院授
贊爲招傾襟作禮倒屣而迎亭伯束帶而待潛夫劉瓛立館近
依楊烈之橋張楷傳經卽號公超之市青衿捧席綃有橫經授
以咫尺聞振之醕聽門下士如秦編修維嶽周主事泰元郭進士
楷皆一時儒彥也莫不揆張藻采跨躡風雲桃李之蹊旣成斗

山之望益重車盈問字之酒人饋束修之羊被容接者若登龍
門邀品題者如附驥尾焉癸丑養疴歸里謝客閉關士安風痺
不廢著書伯業彌衰依然嗜學無如凋年漸迫宿疾難斟爲識
巢門鵬驚集舍孰賓孰主邢卿開壽藏之圖在辰在巳康成受
丹書之識以嘉慶二年丁巳正月十三日卒於家年七十有七
先生內行淳深天懷寬朗奉親如汝幼異事長如庾叔喪眷懷
舊誼逾分宅之邱成篤念疏宗過讓園之陰履彥輔名教之樂
叔寶情恕之譚僚采樂其寬和藏雨服其德址史稱長者易繫
吉人先生之謂矣加以夙耽著述癖嗜詩騷舉牢百家貫串羣
雅伶倫吹律而重敏經迭之辨必嚴輪扁運斤而甘苦疾徐之

妙自得情靈無擁意象獨窺烟雲卷舒金石諧婉所著松厓詩
文稿律古集唐諸稿俱已梓行海內傳誦雞林估舶購白太傅
之編蠻徼弓衣繡梅都官之句豈僅士林馳譽名輩推工而已
哉子承祖承福承禧共守青箱能傳素業夏侯之門有建枚乘
之後生皋以是年三月初八日葬先生於北郊祖塋以先生易
簣之時曾有遺言屬余誌墓胖兢奉命連遣陳詞芳爍早謁李
膺蒙呼小友久欽蕭奮願受專經十載陪游曾荷牛心割炙九
原懷舊難忘壘尾交談敢染丹毫備書穆行陳仲弓之令範紀
以二碑橋公祖之良謨鐫之三鼎銘曰

淵哉若人真想在襟行不雕飾恂恂德心文筆高奇思業湛深

射策東堂聲蜚士林冲懷月和曠度春藹初綰銅墨遂要銀艾
屢書上考百城推最惠洽蒸黎文而無害難進自居稚寶免官
爲法受黜行心所安馬失更喜甌墮弗看一邱一壑俯仰自覺
上相推賢講席幣聘庶士傾風衆流仰鏡河懸待酌鐘扣斯應
推獎風流增益標勝不猗不訾乃昌其詩鼉擲鯨喙放爲倚詞
高穿溟滓紉窮毫釐金鎖名山千秋在斯憶奉譚譙舉觴相對
共索古歡多識前載靈幽體翳曩遊不再獻音永闕徽言空佩
延之後起玉溪小生潯陽作諫香山勒銘巉巉樂石鬱鬱佳城
敬遵古志式揚令名

諸投資政大夫兵部右侍郎右副都御史廣西巡撫孫公

神道碑

蓋聞丈夫立功遇明盛之世聖主聞樂思封疆之臣迹其入參
樞機出擁麾鉞宣布威德拊循華離識量可以安遠人智略足
以懷絕域卒使雕題入貢侮食來王披雒樹之枝屈牙獸之膝
而心力交瘁體魄全歸洵守蓋之貞臣爲挹德之雄彥吾于中
丞孫公見其人矣公諱永清字春臺江蘇無錫人曾祖某祖某
父廷鏞山東德州州同三世以公顯贈資政大夫公天稟異特
弱齡察黷鰲擲筆海鷹揚藝林徧讀經世之書恥爲胥儒之學
才如仲任萬牒吐文智比叔皮千言草奏少以諸生入廣東布
政使胡公文伯幕時土司以爭襲告訐其文牒皆明時印璽大

吏將以叛逆律坐之株連甚衆公別具奏牘以示胡公上之大吏得免者二百人楚獄無濫賴伯奇之上章沈氏獲全佐威明而舉奏識者早知爲遠大之器矣戊子順天鄉試舉人己丑會試取授內閣中書旋入軍機處行走慶霄揚輝靈鳳修羽接上台之符彩掌中樞之綸綽元康閣中作字七紙立成延禎殿前爲文十吏並授遷內閣侍讀充方略館纂修提調官又充文淵閣校理四庫館纂修時武功輝赫文敷隆洽三十六國賦畀紀其土風百五十種甘英志其職貢遂迺綜劉向之七略括李充之四部簪毫芸閣懷鉛畫省聞見旣博員程無曠公聊倚賴如臂指焉 鑾輅時巡 惟宮扈從嚴安近臣兼騎馬之令步隲

文吏爲纒帳之督嘗以要事騎而馳

高宗純皇帝遙識之曰此孫某也孰謂南人不能乘馬耶縛成
慶之袴褶據鞍若飛鳴傳永之鞭鞘視道如咫遂迴天矚膺
斯懋獎詎同張敞但誇便面之拊不數處冲惟矜縈策之妙擢
江西道監察御史生風白簡蜚聲阜囊共憚驄馬之威不特觝
羊之殺踰年遂晉左副都御史超拜端公榮專獨坐不次之擢
前此所未有也

帝知公幹濟之才可任屏藩之寄擢公貴州布政使貴筑遠郡
羅施異俗公竊鉏耒彈治墨吏劉宏下教十部風行賈琮塞
帷百城震悚五年入覲召對稱旨旋有廣西巡撫之命

蒼梧鬱林桂海象郡察鳥言之謀訴懲虎飽之貪焚禁苞苴以
絕官邪杜芽孽而防民患百蠻惕息尊士變之威儀九真環向
服陶璜之恩信廣東大飢穀價翔貴公轉輸有術調劑得宜開
不涸之倉散常平之積望千石之氣可以療饑聯百舳而來無
令遏糴奉 旨嘉獎謂深知大體詩以志之臺灣林爽文作逆
調廣西兵會勦公出駐梧州簡鍊梟俊厚其牢賞士氣騰踊陷
堅突陣賀齊白梮之兵洞胸達腋孟幹側竹之弩福嘉勇公謂
臺灣之平得廣西兵力爲多也南交異域風教壅隔大姓酋豪
互相吞噬土性淫厲難爲郡縣之置人風介鱗不被冠裳之俗
先是黎氏殘莫氏而據其國阮惠復逐黎氏公方以告而總督

遽請出師深入重地以致挫衄 天威震讐命嘉勇公督師議
討公以爲蠻觸交閔外夷之常非敢抗大兵也常惠特節量能
卧護昆彌捐之建議無勞遠攻駱越且委火炎風軍威必然坐
蹶飛芻挽粟民力亦恐不支天戈所指有征無戰安南蕞爾可
以折箠使也嘉勇公然之旣而阮惠悔罪輸誠回面內嚮請封
赤社來覲 絳闕書金葉而奉表歌樂木而歸義 九乾懷遠
錫牙斯之名三象重譯易屈紆之服千載嘉會一時盛事運籌
決策皆公之力焉然自安南事起籌備儲待督運輜重觸冒瘴
癘程治文書囊赤白以交馳案朱墨而錯置精力易竭齒髮早
彫聞鼓驚心伏弔咯血遽兆白雞之夢竟歸朱鳥之魂焉援從

征疾亟猶思裹革張光報國病歿無異登仙以乾隆五十五年五月二十日卒於桂林官舍春秋五十有七公風儀峻整才思都長穎悟絕人魁梧動俗懷橘抱柰孝本天情背碑覆局智非外獎一門昆弟篤伯淮之愛九原朋舊敦季札之誼祿俸所餘散贈嫺族退食之暇拊枕圖史言貫九變而不雕琢曼辭習周萬慮而不嚶喋苛事僚屬服其仁恕氓庶被其惠澤而稟命不融有涯先謝未登上壽遽喪哲人此所以僞終致舍玦之悲箋謝有愷春之慕也公配華氏早卒繼配顧氏賦質柔嘉秉性淑懿姻戚觀禮宗鄒稱賢先公五年卒子某某孫某某備準秀出士林克承家學充方聞之賦讀中祕之書先以某年月日葬公

于金匱縣北胡埭之新阡兩夫人祔焉王述菴司寇撰文銘之
幽宮茲復樹麗牲之石乞表墓之文某拜公邱第夙荷提攜別
公宦游遂隔音範思盛烈其如在覽遺編而曾歎羊曇涕淚彌
軫零落之傷張悌生平難忘知顧之重敢櫛書於令子紀栢鼎
於勞臣授簡奚辭當仁不讓緘其實墨別爲羣玉之藏勒此貞
珉定有生金之字銘曰

猗歟中丞勲德邁古神化丹青休明黻黼翕張經綸施設文武
胸涵靈珠手握機矩鸞翔綸扉豹直樞府英思泉流曠度春煦
峻秩栢臺戟冠鏤桂稜稜鵬鶚嶽嶽觥觥象卉八郡龍編萬戶
銀青開藩英簞行部百度惟貞六條具舉赤子扶扶青疇撫撫

噓茶景風汎溥甘雨炎方片壤交州尺土井喧羣黿穴鬪雨鼠
彼自崖柴非敢旅距云誰夸毗缺我錡斧蠡旂電指虎旅颺怒
公洞機宜謂可綏撫鷄愧甲射鼙惜督卒受纓縻遂格干羽
七族蕭勺兩階儀舞臣節匪躬王事靡盬山川瘴癘霧霽寒暑
疾疢不掛藥石奚補游神粵嶠隕星郭隲巫招桂管喪歸荔浦
禮堂簡策戟門簪組餘慶在韋碩學傳庾鬱鬱佳城蒼蒼宰樹
我鐫銘辭昭示來許

通奉大夫四川布政使姚公神道碑

夫雲屋架構梗枿之質千尋神治挺鎔龍阿之鋒百鍊震風凌
雨識其併茁之功錯節盤根展其斷割之用遂乃起家令牧陟

職藩屏 國家倚爲寶臣疆場樹其奇績而積勞匪懈宿疾不
樹命不副其才名可永於世吾於方伯姚公見其人矣公諱令
儀字心嘉別字一如松江婁縣人曾祖某祖某考某均抱瀟湘
之德表溫倫之美積有家慶誕生國楨三世皆以公貴贈如其
官公幼卽岐嶷長而通健九變貫知言之選八能推冠古之才
逸藻瑰詞驚其儕偶高名僞譽著于鄉閭弱冠補博士弟子員
丁酉科選拔貢生飛虞箭雲靈虬縱壑充方聞之賦登拔萃之
科朝考一等引 見以知縣用漢時循吏半出明經唐代郎官
皆由博士分發雲南署祿豐令兼攝易門縣事改署尋甸州知
州九章惟精三政咸理換薛恭之劇縣興邊讓之方州令典具

張流庸皆復總督誠嘉毅勇福公器異之適四川有警福公移
節鎮蜀葵以公隨幕府陳孔璋之才筆初歷戎行溫簡與之籌
謀宜參軍事首出奇策屢收雋功歷犍爲仁壽二縣令晉石砭
同知以摠文之敏士爲奮武之力臣軍戎以濟無慙汗馬之勞
才幹方申祇膺展驥之任時廓爾喀酋長侵擾西藏將軍鄂輝
奉命進討公隨營籌辦糧餉夷庚星運卷甲風馳預侍邊儲飽
揚士氣以至繩行沙度道路踰難雪嶺冰山氣候凝沍而猿攀
猿附符節應期魚頡鳥跂輻輳不絕鄂公調四川總督尋以罪
降孫公士毅爲總督福公爲大將軍皆檄公入幕公以旣許鄂
公從之不去雖大將幕中書記爭招阮瑀而故侯門下賓客獨

有任安不隨流俗以轉移猶見古人之風義

上聞其事以公爲賢特 賜花翎擢雅州府知府洎廓爾喀事竣調成都府知府民萌徧德僚屬仰流文翁之治蜀郡石室談經王囊之莅益州青衿習禮方將布鍾離之條教振蕭育之鋒稜而檠瓠之種挺災板楯之蠻搆孽福公時以雲貴總督爲大將軍前往征勦檄公至其軍公復衣成慶之服稱媼從戎佩赫連之刀慨慷就道墨磨盾鼻米泔矛頭飛蠱噓烟跼蹐墮水俯弓跛而咯血聞鏹斗而驚心當赤白囊之交馳及朱墨圍之錯置猶復開書七紙立草萬言先是大將軍以西藏之役徵公未至有憾于公至是知公敏達之才獨任賢勞之責猜嫌盡釋禮

意有加將列剡章擢之峻秩會大將軍與人毆都司徐某于營門公叱止之不聽兇逞狠心惡逾雕面肆其抵觸任彼俯張遂擒杖之一夕而斃申金布之條肅銀刀之隊疆項而出董宣格湖陽之奴戴頭而來段尉誅郭令之卒暴橫以戟風規凜然公旋以勞疾請假而大將軍亦薨于軍無何盜起潢池氛纏井絡叢林鴟跂篝火狐鳴三巴煽張角之祇五里起雄鳴之霧時威勤勒公總帥全蜀卽拜經畧之命公以鹽茶道參其軍事奇謀大出嘉慮四迴掌運地圖手爲天馬軍中所獲俘因命公訊鞠全活者數千人元惡旣殲脅從罔治德星鏡朗員索蹕空智燭犀然覆盆光照蒙視濟物其功溥矣威勦公因事被逮公護送

入都事雪仍權蜀帥時數大帥相峙公勺藥其閒勸其和一遂
使甘凌釋忿廉藺交歡主將同心偏裨効命金湯天壘雷電
皇威走魅奔魑覆巢薰穴夔巫砥屬水絕鯨鯢巴楚懷山無
梟鶴全境輒甯公有力焉嘉慶六年莅鹽茶道任逾四年升按
察使數月之內清釐積案六百餘事罔不疑之明決徐有功之
寬平以公方之詎云多讓次年升布政使威勤公推誠論事虛
已測交稱量人物知公無輕重心操縱紀綱倚公如左右手公
亦翦翦如畏髦髦竭忠文案自環竿牘無滯覃思損壽積疾成
災初公在軍中得失血症至是增劇遂請解任調治而終以不
起空謁三醫難求上藥壑川遽賈風燭俄驚僚案軫捐珙之悲

閭里深輟春之慕嗚呼哀哉公內行深淳天懷篤摯崇厚以培
先德敦本而贈疏宗仲海季江勗之庭誥僧彌法護示以義方
接物無媒但之言論交尙綢直之行泊乎當官剴劇臨政撥煩
帷幄仁其謀猷典憲資其整輯被躬樹善濡迹拯民斯又雅操
金貞冲襟玉粹者也芳燦與公交本齊年誼深同譜又與弟揆
其參戎幕俱掌藩條未及十年後先溘逝宜勞盡瘁難保玉躬
急景凋年易銷金骨公之亡也某尤有隱痛焉公以某年某月
日卒於成都年五十六子椿樾奉公匱歸里於某年月日卜葬
於某原姚比部龍孫兵備星衍皆賢達素交文章雄伯旣作銘
幽之誌復爲表墓之文某稔悉平生眷懷疇昔總持撰陸襄之

誅義在酬知爾成著蕭丞之銘憾深思舊屬以關河臨泊衰病
侵尋杼軸於懷載更星紀悲銜於口愧在其所是以濡染丹臺
應文度再三之請摩挲樂石書太邱第二之碑銘曰

猗歟哲人崇情遠迹舉半文藝驅馳翰墨蛟龍入懷風雲在腋
裕乃經猷展其輪翮拔萃書判起家雄赤環流治譜屈蟠兵策
玉帳唱籌柳營飛檄壁壘星陳糗糧山積筆奮神錐弓開伏石
捷應捶鉤響聽鳴鏑才識開敏風裁勁直強剜虎牙威觸龍額
懋賞疊膺崇階洊陟豸冠挂鐵烏臺列柏參井大藩蠶鳧舊
國萬戶承流百僚舉職

帝納嘉謨人傳偉績中壽未登徂年遽迫蜀日頽光棧雲晦色

華屋山邱佳城窀穸陳實高名劉寬盛德爰樹兩碑千秋不泐

文學劉乙青敘略

嘉慶庚午歲余主關中講席朝邑劉生學寵負笈從遊受丁寬之專經預庠乘之末座其人恂恂儒雅士也因述其世守儒業家敦素風金昆玉友俱負穎姿仲海季江咸能媚學其次兄學向尤爲振奇惜其稟命不融中年隕卒爰敘其平生崖略屬余志之君名學向字乙青號陡山世居朝邑之龍門邨五世壙僚一門穆行君生而憎定長更恂並修業無息版之時爲潛絕踐繩之迹約收自好湛深多聞黃香則優行無雙紀瞻則秀才第一作關中之都講爲隴右之聞人緇帙縹囊著六儒之論蟲書

蚪篆摹三體之經方冀碩學成名酬桓榮之稽古方聞充賦寵
趙典以徵書乃蘊璞無輝含香未越亭伯達旨孝若抵疑散藻
含毫紛欣獨樂編蒲緝柳研究益勤董遇獨抱冬心尹儒學成
秋駕未嘗以得失累其懷寒暑愒其業也至其天懷濔濔至性
纏綿竭力忘飭承顏盡樂石建則褰襟親浣束皙則羞膳常豐
己酉冬生母李孺人卒君頰寒泉而沫泣攀壠樹以隤心廬墓
三年哀毀骨立灑許孜之淚茂樹皆枯聞蔡順之號馴鳥自下
以今方古殆有同符先是哲弟捷三負才天閤君誼篤友于踰
時猶慟念其繼嗣未立不爲表墓欲綿脰之緒始樹棠棣之
碑有志未成弟昆俱逝良可悲也膏明而燭翠羽而殃隙駟不

留尺波電謝心殫義府既耗精神踵躋焦原又更憂患長離未
舉而勁翮已摧吉良欲馳而健足中蹶徐悝不祿設祭僅有孤
嫠輔嗣云亡傳業并無弱息宜學寵之追述遺徽而招膺洵涕
也茲當禪祭之期宜爲神道之誥陳思作仲宣之誄表以素旂
醴陵悼叔明之文書之青簡

明誥授通議大夫翰林院編修廣東按察司副使分巡惠
潮兵備道青海魯公傳

公諱元寵字君世號青海浙江會稽人魯氏自政成三異學興
五經荷擔吐奇佐南邦之霸業執簡抗節振西臺之直聲世非
曠僚代有明德公生而穎異長益魁奇身若植鱗目如巖電以

班旂之碩學兼蔡雍之逸才下帷專思重席擅業萬厯戊午順
天舉人崇禎戊辰成進士釋褐授江南徽州府推官作平刑之
司理轄捕盜之督郵赤棒宣威彤幘問俗時有布估二人爲盜
所殺守牧已捕一人抵罪公廉得其寃密以布估所遺圖記遣
人四出買布與圖記合者究所從來遂獲真盜四人置之法崇
禎治庖饗客卽辨屠刀傳炎縛柱鞭絲能看鐵屑遂平疑讞其
頌神君旣乃薦牘交推璽書特召表陽城之治行獎輿遂之循
良莊烈帝臨軒策試趙充國屯田議公援筆立就恢張智畧洞
悉機宜十二事撤戊己之邊防八千人增庚戌之土斷議上稱
旨曰魯元寵不特政事第一文章亦第一卽授翰林院編修耶

官報最入爲俠御之臣法星移垣遂直文昌之府司李之遷館
職者自公始蓋曠典也時則嚮臺左掖曳綬中朝人稱池上夔
龍帝倚禁中頗牧法咫尺多所淹通公望公才隱然丰采中
涓鼎貴欬與交懽公崖岸自高危言謝絕勝朝寵任闔寺獎賊
威權二孽之醺雖燿四星之光復熾張樊憲按行兩部高起潛
監視諸軍金貂右璫出入殿省苴茅分虎凌轢公卿時有大充
謂公曰魯翰林風流大雅不久將登台輔矣他日南北兩衙能
和衷共濟乎公直視不荅王墮國士詎識董榮李膺黨魁何知
張讓態臣因而側目朝貴爲之寒心公夷然不屑也未幾奄人
陰嗾吏部出公爲廣東按察副使分巡惠潮邊隅凋劫之區海

裔華離之地九探赤黑變起倉黃公乃誅惡子之狼貪懲姦胥
之虎飽亭公弩父戶設游徼里尉鄉師野除鈔暴卒使梟風革
面狐火潛蹤牛脫佩而朝耕雉忘羅而春乳羣僚徧德比戶懷
恩以視雄文驅惡溪之魚惠政感零陵之獸炳耀方策今古同
符三載還朝遂乞歸省以沈太君有羸老之疾無復仕宦之志
北堂護竹南陔采蘭浣石建之翬視榷邪之膳與弟都憲晉侯
公友愛臻至晨昏必偕杜門懸車不與噴室之議編章折撻惟
定禮堂之經時當霄路烏號虞淵日薄羣飛海水已蔽天杭隻
手夸娥難扶地軸魯王監國以左副都御史召不赴薰銷龔勝
之年帥沒孔珪之宅韜光匿耀肥遯以終公爲推官時再攝欽

篆又攝休甯篆拊循孤弱鉏治豪強路絕行禽市無訛虎迄今
徽人與潮人兩地祀之祠王渙於安陽之亭圖朱穆于東都之
驛遺愛在民非偶然也公充庚午應天鄉試同考官庚辰會試
同考官璣鏡當胸靈珠在握鑒拔雄駿提拂孤寒伯鸞一顧重
于簾金展季片言信于岑鼎凡所品藻半持鈎樞游殷識張既
于童牙王修賞高柔于早歲蓋薦賢報國公之素志云公猶子
謙庵先生仕國朝以銀臺卿外謫亦任惠潮有善政張猛仍
莅涼州杜緩再來蜀郡薛內史之磐石劉丹陽之古柳後先輝
映鄉里榮之公文孫和仲先生夙有異稟幼多咫聞潛心道淵
馳譽藝圃枕經腴典袁伯業之嗜書規箴矩模鄭次都之勵行

纂輯家乘建立宗祠敦倫睦族克承公志讌林移居蕭山今已
五世仰公穆行撫公遺事胖胖兢兢惟恐失墜將鐫樂石屬余
補傳汝南先賢襄陽耆舊敢援斯義陳其梗概謙庵和仲例得
附書傳之雲仍敬俟愜史

芙蓉館文鈔卷七

芙蓉山館文鈔卷八

金匱楊芳燦蓉裳著

甯朔縣尉聞君墓誌銘

君姓聞氏諱天民字某吳郡長洲人也丁未之冬余刺靈武君尉朔方展梓里之素歡幸雷封之接壤時共譚讌悉其生平君祖某父某世守儒業家傳義方君少工藝文壯躋進取爲貧而仕以祿代耕屈黃綬之卑官鬱青雲之奇志筮仕得甯朔縣尉視獄惟謹恤囚以仁清圖戶之煩竭出輕繫之枯萃可謂一命之士能行其志者矣朔方地濱大河田多沃土渠侔鄭白堰同壽陽君審隄障之宜盡疏濬之力遂使舄鹵胥壅藎夷無淫民

咸賴之君之力也惜乎長轡未騁修齡不延空習龍宮之方遽
兆狸脹之夢以某年月日疾終官舍君配袁孺人孝德篤於庭
帷淑行聞於宗鄣中閨代匱健婦持家茹葷荼以如飴供滌灑
以罔缺以某年先卒於里門君生營薄祿沒無餘財慨廉吏之
難爲悲旅魂之久滯越三年嗣子詩始得扶柩歸里將與孺人
合葬于某原臨行捧手洎涕請銘余與君爲同官君之子詩又
受業于余誼不敢辭乃爲銘曰

天懷儻葛君真長者未竟所施才高位下聊營升斗以代耕耘
撫民以惠趨事以勤膏壤疏渠蓄洩灌漑督爾鉅鑄潤爾耜耒
釜甌生塵卑卑耐貧沈淪邊徼終身苦辛君之淑儼孝行堪紀

良人遠官婦職代于舍寔非古周禮所存一棺萬里同穴雙魂
榮榮孤嗣終天抱恨文章既成羽翼斯奮行矣勉旃無忘先澤
我表幽光勒之貞石

陝西岐山縣教諭陳君墓誌銘

蓋聞滂仁曠義無憂名德不升冠述履約自有方聞足重是以
韓嬰著論爰推先醒之名荀況傳經徧列眾儒之目若夫居萬
流之屋爲羣士之師含咀道腴佩服聖訓周官所謂儒以道得
民者吾于同年友秋谷陳君見之矣君諱葵英字衣如號少山
秋谷其晚號也世居甘肅之安定七葉素儒一門樸學世澤載
于家乘庭誥式于里閭君幼稟異姿夙敦穆行守蓬華而無悶

織絳瓦以自供呂向就藥市以觀書游雅乞漿壺而作字三冬
勵志萬牒摛文心醉六經胸羅百代以至景純蟲魚之註用如
草木之書鐘鼎銘辭尊彝款識無不寓目閑解遊心默通年十
五補博士弟子員學使宮清溪先生器之識高柔于幼歲拔擢
旣于單家咫聞日多令譽斯起時海豐吳恭定公守鞏昌弇山
畢公觀察隴右每見君文輒加激賞威明望重側席而待王符
有道名高下坐偏尊庾亮以今方古異世同符額乃十赴省闈
屢薦不售開元射策偏擯杜陵嘉祐掄科獨遺明允博士擲而
輒健射每發而解弼固知賦命之奇非關操技之拙也丁酉受
知于學使稽晴軒先生貫入成均戊戌廷試二等充四庫全書

館膳錄官元叔隨計吏之車稚圭注選人之牒隨西雍之衆僞
校東觀之秘書期滿例以直隸州州判用君呈請改授教諭事
功非王弼所長閒寂實杜欽所好願爲博士甯辭苜蓿之餐甘
作冷官仍守黽馳之徑既乃秉鐸岐山君忻然曰教授生徒吾
素志也岐山鄴邠釐之故地有豐鎬之遺風士氣清瀟民俗樸
僊君迺啟陸澄之厨發邊韶之笥習禮秩秩論文斷斷元亭問
字從遊豈獨侯芭禮堂寫經執贊何須應劭後進之士翕然景
慕文風丕振君之力焉君蘊義生風趨善若渴留賓設子玉之
饌周急解伯桃之衣陰德及物自覺耳鳴徹言盈筴曾無口過
在岐山時力爲維孝子請旌闡揚潛德尤其犖犖大者至于工

書居遁峻之間嗜古在酸鹹之外勒朝鮮之楹尋鍾離之碑詩
文稿外著有岐陽集古錄藏于家雞林購白傳詩篇百濟索蕭
雲筆墨辨甄邯之威斗識子尾之犧尊斯又拚雅之別才博物
之餘事也君任岐山引疾歸里復起耆靖遠實德教諭造上有
法如在岐時嘉慶五年復以疾作乞歸正月二十三日卒春秋
六十有大娶孫氏封孺人子三正常兆常敏常皆以儒業能世
其家女一孫男一茲正常等以某月日卜葬書來乞銘余與君
淵交廿載賦別三秋青簡常存黃壚遽掩琴歌酒坐從今不接
風流馬磨牛醫疇昔曾同月且雲迷宰木空餘挂劍之心土蝕
貞珉或有生金之字銘曰

猗歟我友風義近古望德而趨抱道而處粹掌志苦下帷業勤
謁如春煦靜若夏雲屢試不售明經入仕竿牘簿書非性所喜
愛閒多病迺乞儒官五經紛綸今之井丹文藻蔚炳著于岐陽
宛宛長離和鳴歸昌秀髦承風窮經媚學執古醇聽覺彼後覺
少歲攻文迄于華皓齋志以終聳乾蠶老青山邈迤幽宮在斯
斷石考行庶無愧辭

甘肅鞏昌府知府胡公墓誌銘

夫擅制作之才而張左不嫻吏幹播慈惠之譽而龜黃不事文
章卽有石室談經桑弧習禮雖表儒雅之望卒鮮編簡之傳若
乃十行奉牒千室鳴絃辭宗辯囿學貫九流縣譜州書政標三

異具通人之宏致爲大雅之兼才于息齋胡公見之矣公諱紀
謨字獻嘉晚號息齋浙江山陰人出文定之華胄爲吳會之望
族代承隱德世非曠僚考雅宗公抱器幽潛含道履軌王烈以
公方服物郭泰以盛德感人州里歸高姻戚矜式公天質醇嘏
神識都長瞻合之辰孝敬發于至性鷩彌之歲朗悟挺夫殊姿
強記贈聞驚其耆宿英辭麗藻軼乎朋儔雅宗公稟性方巖晨
夕督課中榆小榆寒威正肅甲夜丙夜誦聲不休雖在元辰不
覺申旦年甫十七依伯父于通州寄籍應試受知于學使金檜
門先生補博士弟子員荀卿嘗年十五始舉秀才鼂錯試字九
千乃得掌故旋丁母憂星奔南下哀毀骨立幾不勝喪服闋應

戊子順天鄉試中式舉人含香漸越令聞日起趙臺上計司徒
降階王符踵門度遼倒屣宜乎舉牢七略揮綽三雍旋以雅宗
公捐館聞訃南歸臯魚抱木而幾枯崔九吹風而卽倒四時瞻
拜每伏故匳萬里奔馳惟持遺硯庾褒明發有懷二人鮑昭同
氣實惟一妹孝友無間族儔稱之公愴艱棘之屢丁悲鍾釜之
不洎忘情于進絕意希榮堙暖自甘臙臙已甚遂學攝生之道
求服氣之方朮序芝圖丹鑪藥竈拘嫌資養梓茹供餐後復遷
于大房山中陰堂夜響似喚祁嘉石壁展開歡迎辛繕八齋七
釜靜讀仙經六燄十芒問繙秘笈幾將守處子之耿介尋真逸
以遨遊矣嘗夜夢雅宗公曷以宗嗣爲重並命出仕以宏善果

辛丑始出應會試大挑一等奉 旨分發甘肅以知縣用含神
霧以度世蒙厯褫以拯民甘肅當兵燹之餘爲華離之壤公乃
拊循凋劫招復流庸濟阨扶傾風糴露沐孔君魚之清節出宰
姑臧惺惺伯之高才遠官樂浪補鎮原令調署安定路當孔道
輶傳絡繹公損供億之煩除征徭之累時逢大祲民困荐飢顛
請臺府奏明蠲賑先發倉廩以給餓者員半千能濟飢饉明山
賓何辭耗闕起瓢甕之瘠均鍾釜之施全活者數十萬人調任
中衛百姓攀留遮道涕泣三老上書願留焦輦一州臥轍爭挽
崔戎大府體察民情仍留署任時有陝西鳳翔奸民雷得本倡
立邪教煽惑甚衆公奉臺符馳往會同查辦既抵鳳翔人心惴

懼公命設樂置酒潛以輕騎執其元惡十七人而歸武襄張飲
遂已擒渠文偉圍棋竟能辦賊兩省官僚咸服公之膽識也丁
未抵中衛住會

高宗純皇帝閱宋蘇轍元曹伯啟詩以涇清渭濁其說可據毛
鄭傳注或有謬誤特命西省大臣察視大府聚重公方聞博
識因檄公與鞏泰階道李公殿圖分查二水公乃登斧頭涉薄
落窮源溯流澄清無滓恭著涇源記繪圖以獻奏上

純皇帝題之學過酈元堪補水經之註功侔王景合賜禹貢之
圖大府由是益重公壬子調皋蘭首縣地界要衝邑兼赤紫案
牘山積驛騎星流邊郡多奔命之書旁邑有疑難之讞公從容

應事剖決得情州次部居朱出壘入夙宵不勸砥節首公乙卯
擢安西直隸州瓜沙邊裔蒲昌瀚海土性深厚人風樸瀟公撫
以慈和政尙清靜先是州屬常有狼患公莅任後爲文以祭社
神其患頓息巨猾張雄橫暴鄉里聞公至挈家遠遁終公任不
敢歸虎真出境盜亦奔秦強衙改節張歐未嘗按人惡子潛蹤
王渙無須著籍盡革苛燒之政遂變枝拄之俗古所謂以德服
民者公之謂矣方川楚教匪不靖公隨制府宜公至興安辦理
軍務復隨方伯廣公至階成辦辦堵禦事宜後因青海生番滋
事又隨制府長公前往剿撫疊灰箭火矛浙劍炊磨盾作礮據
鞍爲几蹠穿膝暴口不言勞事竣大府以公歷年勦績列入薦

章 特擢寧昌府知府引 見後請

上垂問青海番地情形奏對稱 旨鞏郡毗連楚蜀號稱難治
公廉平鎮靜氓庶乂安旋護理鞏秦階道六條馭吏九職鳩民
農戶優啗士鄉絃誦庚午以年當大董引疾乞休書疏再上得
如所請而積齡已迫宿疾不瘳遽兆夢瓊池沈連石遂以是年
九月十一日丑時卒得年六十有八公行合羣弦操厲冰蘗含
靈湛鏡蘊智成夔內行深醕交情篤摯寬中如卓茂蘊藉如桓
榮雋味無窮情瀾不竭張憑言旨元遠足暢彼我之懷韓康思
理倫和能通古今之奧治獄則不從奇請從軍則不邀高功裴
子野自刻亡期任彥昇可云知命生播高譽歿垂令名落落焉

其有風飄者也公生平酷嗜風雅述造甚富著有知足居詩若干卷文若干卷均待梓行公元配潘恭人繼配嚴恭人俱名家女有淑德子二定生衛生秀穎能文克紹家學茲定生于辛未四月十七日將扶公柩歸葬于山陰之祖塋述公遺範前來乞銘芳燦與公廿載同官交傾肺附稔悉行義不忍沈湮爰勒貞珉俾之穹壤銘曰

文章政事本無二途樂情禮意慈惠以敷公性通儉大方無隅恥與庸人驕並拾驅少歲敦行規箴矩矱中年兼仕智燭信符噓枯潤槁赤子扶扶汨要銀艾典籍是娛百家五總波瀾委輸繫古循吏實惟通儒達生者傀達知者胥委化知息舉如曠如

身沒名豈丹青不渝我銘幽宮徵實匪誣

例贈登仕郎邑庠生華春林先生墓誌銘

公諱某字近光號春林江蘇常州府金匱縣人南齊孝子裔孫
明學士子潛先生八世孫也世德作求人倫著望溯純孝之華
胄爲道德之高門大小夏侯世守儒業東西裴氏代非壙僚考
子謙公品詣端瀉操行純備藏經緯於不試樂優游以順時李
仲元并式州閭張公超教授鄉里母諸太孺人女誠克嫺婦德
彌謹辛勤紡績攻茹蠶鹽內政聿修家道稍裕公生有瀉行幼
稟異姿典要之言恒服其老宿孝悌之性早篤于庭闈明三物
于鄉橫七經于座文成陸地賦擬凌雲方謂弱水可航強臺直

上乃因靈根中萎乾蔭忽傾陟帖嗟傷發楹愴惻乃移心時醫
之計有事羽鳩之司以樊重之治生兼桓鸞之勵志耕奴織婢
人無坐食之虞芋圃瓜畦地有常收之利絀素之側雖雜以米
鹽鉤稽之餘不忘夫鉛槧某歲補博士弟子員剔蠹搜芸鑽鐙
散帙感芹香之晚掇或桂蕊之早攀迺大中射策偏逸溫岐龍
紀掄科屢遺羅隱兩應鄉試不售遂怡神樂志絕意希榮先人
故宅舊傍廉泉處士幽居新栽讓木子謙公歿時諸庶弟俱在
襁褓公爲延師訓課經營婚娶友愛臻至迅寒急景驗大被之
奇溫越陌度阡乘下澤而共樂田宅可讓何有于銅盤重肉婚
嫁有願均及于玉樹植梨條風披拂葛藟庇其盤根膏露滋培

棣鄂韡其澤色怡怡一堂無閒言也更迺蘊義生風趨善若渴
宅心仁恕擴量淵冲陰德耳鳴崇情雲藹貧宗賴之炊舉執友
仰其財通乾隆甲辰乙巳閒歲逢大稔時值薦饑公首倡輸粟
以濟飢貧呈請邑令各鄉一體蠲振公率同董事悉心經理杜
其遺濫鄉人藉以全活者甚衆黔敖設粥子敬指困莫不操量
鼓以虛來挈瓢囊而實往事竣上憲給惠濟桑梓扁額名其鄉
爲崇仁之里指其居爲履道之宅父老之於蘇則頌美而歸高
州將之於邴原式閭而致敬盛德感人固其宜也公秉性綢直
養氣恬愉自樂蕭閒無他嗜好花竹供其麗矚泉石暢其雅懷
鹿門子之尤序芝圖香山叟之藥鑪經卷徜徉林澍嘯傲煙霞

折簡延賓舉觴命侶雖應休璉之爨祇有樵蘇而榘子王之筵
必豐羹臠朋儕樂其坦易臧獲被其寬仁非寄通于挹景之區
弭節于和神之國者而能如是乎況乎舊德不忘內行尤篤尊
宗祠而門輝綽楔護先隴而蔭茂松楸書策栢樅之慕迄華皓
而不渝蘋蘩魚菽之供勗孫曾以必謹其持躬植範接物待人
洵可謂金心在中玉質無玷者矣徂年易流有涯先謝嘉慶十
一年九月十三日辰時卒年七十有二德配馮太孺人名門淑
懿開範夙彰先公卒於乾隆六十年九月初七日卯時年六十
有一子二斌陝西候補主簿某業儒孫四某某曾孫四某某茲
斌將以某年某月奉公暨馮太孺人柩附葬于某山祖塋之昭

乞余作銘余于公爲姻家子素仰風徽稔悉行義敢濡丹筆勒之貞珉銘曰

宰樹翦鬱高原峻嶒曠如畢如幽靈所憑惟公淵懿先緒克承孝友淳至希風閔曾抱德煬和謙而不矜夙耽墳素疲精細縻把卷隨月斷帶續鐙屈首贊序名德不升祓躬樹善立心必恒蒼天與直錫羨有徵蘭芽玉茁子孫繩繩我銘永臧以福雲祚

甘肅鞏昌府知府署鞏秦階道黃公墓誌銘

公姓黃氏諱某字潤之世居江右前明洪武進士諱某者公五世祖也因避紅巾之亂流寓湖北黃岡縣復遷漢陽遂家焉高曾以來代有隱德經明行修抱道不仕考某太學生縹囊緹帙

觀書成均絢履鉢冠授學家銜含香未越韜華以終公負英時之姿秉滄鬯之行幼遭孤露恪守儒風偕其弟易齋公共侍偏親友愛臻至地員宙合讀經世之書天曲日循講濟時之略偶營居積以備旨甘鳩羽漸羸烏私獲展有讓瘦推肥之誼無緩儒弟墨之嫌奉季雅之觴共伯淮之被庭闈之樂怡怡如也乾隆丙申歲援川運例以巡檢分發四川遂綰半通之綬營三釜之供不辭枳棘之卑栖自有荃蘭之遠馥時金川大功甫歲軍儲未核月日參互條目紛繁公乃行抱文書寢懷鉛筆朱出墨入州次部居綜理無遺會計已當才識並懋率司嘉瑞補彭水縣郁山鎮巡檢旋膺保薦陞補太平堡主簿時大府以戡膚地

方遼關民獮雜居特設此缺以資彈壓公于是續諭蒙之書贊
理縣之譚蘇珦來而案無積牘桑懌至而境戢羣偷黎庶懷恩
獮夷嚮化復捧檄經理平番局事軍需告竣再列刻章又隨川
督和琳公進征楚苗稱旋從軍慨慷就道祖述著鞭而起王尊
叱馭以行衣裁成慶便擊黃鑿刀握赫連能馳赤驃彎繁弱以
射賊起駢隣而翼軍箸籌鞭算動合機宜矛淅劒炊備嘗艱險
大府由是益重公事平陞補蒲江縣知縣莅任匝月檄署南充
未就道而達州教匪不靖卽調赴達州軍營斯時也偵騎馳
嚴烽電警邨落有蒼黃之衆斥堠多赤白之囊公則艾蘭爲防
拔戟成隊宵憑警枕曉聽吹鞭餽軍之粟千圀禽敵之符九寸

儲侍山積師無庚癸之呼壘壁星陳尉兼戊己之位保奏以同
知直隸州陞用卽署達州州民申志修等新圻賊黨將伺官兵
出城時乘虛掩襲公偵得實情先期擒訊伏辜藏伏突之刃偃
倉英之旗術既明于耀蟬功乃捷于搏鼠巨猾則俱膏樵斧餘
黨亦咸就維婁賊首徐添德王登廷等謀據太平寨公掩賊不
備馳抵寨門與紳士鄉勇併力固守三晝夜賊不得上公度其
計窮率眾掩擊適大帥引兵截剿兩路夾攻斬獲無算嚴其鶴
列潰彼蟻屯箭火盡灰扼鮑信之堅壁黨旗族旄練李瑒之鄉
兵乃復短劍刺鯨空拳扼虎兵鈴指畫契箭傳呼環武剛以爲
營斷靈鉞而誓眾卒使兇渠授首殘孽潛蹤事聞奉 旨署達

州知州黃銑文員能於剿賊甚屬可嘉旋補授石碇直隸同知
仍管達州軍務庚申隨同總督勒保公于龍安府平武縣生擒
首逆汪瀛入奏奉 旨著以應陞之缺先行陞補壬戌官兵殲
斃賴飛隴等大府奏公久歷戎行賢勞懋著蒙 恩賞戴花翎
荷 綸綍之褒嘉膺 檄章之寵錫公亦彌軒勇氣盡瀝丹誠
擒渠掃穴開道用奇斫箐焚林搜牢莫遁激義兵之氣兎起梟
趨壯介士之容盡耀蛟奮遂迺封狼歛角伏鼉銷芒民樂耕耨
邑停桴鼓甲子晉潼川府接署保甯府奏補順慶府莅任未久
因常公發祥陞任四川按察使兒女姻親例應迴避籤掣甘肅
奉 旨補授鞏昌府兼護鞏秦階道篆循三互之成規典兩河

之劇郡尸祝庚癸難亡畏壘奉嘗朱邑終戀桐鄉官已遷秦人
還思蜀兼之年當大祲民困浣饑戶給淖糜手操量鼓憫流庸
之凋瘵憂廩庾之空虛蒿目勞心櫛風沐雨徂年已迫宿疾不
掛遽兆夢瓊奄沈連石以某年月日卒於官得年七十有四公
天性慈和內行純備方寸之心惟愛日終身之慕若嬰兒士變
則兄弟同官韓康則舅甥共宅際人倫之盛盡色養之歡謏先
隴而蔭茂松楸贈疏宗而分均金粟焚質券之三篋其縣綏之
百家卹成割產而篤窮交鍾離辦裝而嫁孤女施祁寒之麤裘
驅剛痺以刀圭古所稱蘊義生風趨善若渴者公之謂也公配
馮氏 誥封恭人先公卒子一某浙江湯溪縣知縣女三今某

將奉公柩歸葬漢陽之祖塋具狀請銘某未接光塵夙欽行誼
緬靡丹于庸部惠政長留想魏尚于雲中英規如在特書元石
用寘幽宮雖龍泉之氣長埋而麟篆之名不朽崇封四尺永依
敬梓之鄉宰木千章台表樹樂之墓銘曰

上馬殺賊下草露布如傳修期兼備文武按條察吏傾襟禮賢
如鍾離意威惠並宣才思都長節概忠雅氣帥萬夫官終五馬
枕戈磨盾雄彥冠倫身歿名邕爲國力臣鬱鬱佳城岡隆澤
窅千秋令名視此華表

福建臺灣府鳳山縣知縣 卹贈雲騎尉世職吳君墓表
夫捐軀赴難識志士之成仁臨事決幾服儒者之有勇是以陽

瓚貞臣殉義滑臺之戍杜篤文史戰歿射姑之山士君子職膺
民社出綰銅墨值巨猾鈔盜兇渠橫行扞衛侯遮艱危搏戰迺
至畢命鯨波之外橫屍虎落之旁骨鏃通中面創裂血如吳君
者其節爲尤烈矣君名兆麟字德洲號雪槎江蘇無錫人高曾
以來世守儒業四經並授七業俱興君考凝香先生諱某孝友
性成行誼醕備藏經緯于不試樂優游以適生王彥方化行鄉
閭汜稚春施及州里潛德不耀令譽自彰君幼而岐嶷長益慧
邁凡將元尙小學早通魯說韓故專經能治蓋君伯父工部容
齋先生學士易堂先生均以經學起家儒術顯世后倉禮經七
十卷丁寬易說三萬言條篇撮指校羣書于天祿考同撰異折

眾論于石渠君仰承家學既有端緒兼以彊力殫其研求遂能
含香藝林擢秀學圃年十七補博士弟子員士流寫公叔之書
先達倒威明之屣赤鸚賦就袁淑遂匿其文黃絹碑成魏朗亦
焚其草乾隆癸卯中江甯鄉試副榜屢應京兆試薦而不售匡
衡之試文學止得丙科摯虞之策賢良僅登下第高才不過識
者惜之庚戌考取八旗官學教習秩比訓儒坐三經之席班儕
都講集五館之生期滿引見奉 旨以知縣用未隨牒以謁選
乃投筆而從戎時苗匪不靖殃徒構逆福嘉勇公執靈鉅而灑
寇乘琅鐸以平蠻君以儒生軍門上謁短後成慶之服高前舞
陽之冠卽奉臺符俾轉軍餉星流電速士飽馬騰龍節如期懸

旗改色事平幕府上其功選用越等戊午選授福建壽甯縣
知縣小邑寡民訟庭無事君以劉寵之廉平行阮种之簡惠吏
民同聲謂之不煩在任數月大吏謂君才足以膺赤紫德足以
撫流庸臺灣孤懸海外俗稱難治迺薦任延之才換尹賞之縣
君以親老固辭不許遂逾鯤身抵鹿港隸鳳山縣事蠻落無城
番民雜處宵小乘機交相煽誘急則鋌險緩則養癰君迺寬嚴
異施德刑互用輿遂治盜理渤海之亂繩虞詡擒姦誅朝歌之
綵綫時姦民吳光傳番賊三巴六連結嘉義匪徒刻期起事君
廉得其實密募壯勇將賊目三巴六擒送省城正法賊黨兇懼
搗竿並起君躬持露陌馬束股縋度尙知兵景丹持重人蒙甲

以成隊地艾蘭以爲防契箭傳呼義兵距躍克靖飛頭之孽只
如反掌之間賊平君以鳳邑爲郡南要地不可無城議捐俸修
築以委解京餉不果逾年君差竣回任而懷甌之俗未革探丸
之黨公行君嚴金布之令設鉤距之法酋豪盡翦惡子咸誅衆
志成城千夫共膽方謂列戍無驚夷庚可塞也無何鶻騎星馳
狼烽電警蔡逆全幫賊艇徑犯鳳山君仗劍當門椎牛誓衆簡
練梟俊結束弓刀射危檣之怪鳥落雁名都殲聚窟之妖狐老
熊卧道梟其渠帥攀彼牙旗士氣方揚賊鋒大挫時乙丑正月
事也至十一月蔡逆勾結陸路姦民復窺滬尾時總鎮諸公均
備兵北路賊乘虛南下逆匪吳利萬等糾衆應之斯時也壞雲

聲壓賊水朝飛更無鷄時之城可禦狼奔之寇孫恩萬舳衆號
水仙張燕一軍羣呼山賊蝘蜒吹雨誰犂螯虺之頭蠱毒噓煙
孰斷廬亭之尾君乃身披越鎧手淬吳鉤翦爪設衣作書磨盾
高堂屬弟對法護而歔歔愛子託人呼別成而慷慨孝侯臨命
賦詩迺幸令終新息誓師裹革方酬素願遂復橫戈直入披羽
先登觀者知君有死志矣旣而蘭干箭盡不懼倉英之旗陰陵
路窮終嬰伏突之刃力戰殺賊身被十餘創遂遇害嗚呼哀哉
大府以君死事狀入奏奉 旨照陣亡例賞給雲騎尉承襲
賜祭葬銀一百兩入昭忠祠隸孤兒于羽林祠國殤于宗布表
無忌之節風勵于來茲念張嶧之功賞延于奕葉龍章恩重馬

嚴封高九原有知可以慰矣君弟某子某艱難漏刃號泣招魂
求君遺骸知爲高王二生收護復表明器以禮入殮血尙未殷
眦猶怒裂生時勁髮上盡衝冠死後空拳握眞透爪嘉兩生之
義烈沐三禩之 寵榮鯉渚魴潭安返次房之骨犀肝蜺茀遄
歸穆伯之喪韋母憑棺杞妻臨穴非君之忠孝上感神明而能
如是乎君生於乾隆丙子年二月初六日死事以嘉慶乙丑年
十一月十九日得年五十子某以丁卯某月某日奉君之喪歸
葬于某鄉某原復累君行事乞爲墓道之表禮也君秉性英淑
負材振奇敦叔喪之素風修文彊之內行余與君推襟早歲投
分齊年弟英燦又君之妹壻也締葭莩之世親託文字之密契

自分宦轍遂闕燕譚癸亥君以解餉來都銜杯話舊共循短髮
各愴離悰官事有程臨歧惜別燕雲北滯越鳥南翔路阻重溟
書傳隔歲騰風動地將吹夢以奚之蜚氣成雲何相思之可寄
遽傳凶耗喪我故人雖臧子源之志節千載如存而張元伯之
交知平生已矣援來禿管愧我無文勒以貞珉期君不朽大書
神道敬告鬼雄沴氣未消猶鼓長鯨之浪英靈不泯應飛白馬
之濤嗚呼哀哉

容太空先生墓表

夫滂仁曠義爲抱道之俊民川蟠林潛有韜寶之君子蓬蘞自
蔽介介常守其貞藜藿無糝坎坎不失其範探經術之樞奧挾

道苑之喉襟規筴架橫姓氏升于州乘儒宗學府品望重于鄉
評遺紉翰藻之閒賁華竹素之上如太空先生者斯其人與先
生姓咎氏諱萬有字太空一字伯涵陝西寶雞縣人也代有隱
德世非壙僚閒出通博之才共推方雅之族先生稟五常之性
明三物于鄉幼卽恂通長而秀歸執古之醇聽味道之華腴穆
行克敦純修是踐扇文疆之枕浣石建之裙袂鄂連跼荆枝達
枿抱子纈季江之嗣割宅成許晏之名汜毓之家兒無常父董
陽之室爨無異煙其制行之瀟灑也如此至若朱穆貞孤井丹
高潔拘蟫蠅以資養織絮毳以供餐適志自娛居貧何病不乞
胡奴之米自采周黨之薪嘗曰惟貧乃視其所不取設不貧卽

不妄取烏足尙也是則被季次之鶉衣溫于狐貉啜北宮之菽
菽美過珍饈其持躬之耿介也如此若乃閱覽典墳冥搜載籍
折衆說而垂訓括羣言而暢旨薈蕞篇翰鉤稽緇縉每斷帶以
續鐙時鬢髮而焮掌虞書稽古刪秦延君三萬言之繁魯論傳
疑正徐遵明八十宗之誤窮源竟委百川承流研精洞微六府
如燭其隋學之專精也如此于是居萬流之屋爲羣士之師人
餽束修之羊門盈問字之酒以蒙來叩望若斗山以疑相質奉
如瞽莛先生汲引無倦講習不休傳六經七緯于緇壇儒林望
重萃八索九疇于函丈繼拔名高茂先成勵志之詩虞溥著勸
學之誥謂士以敦行爲本學以立品爲先臨財如圉文生之多

情守道如黃子艾之不篤雖掇科名登仕籍絕之勿與通也是以門牆崇峻學術端醕使盛服者畏見子將盜牛者遯羞王烈其立教之嚴肅也如此若夫握文字之瑤樞表言音之藻鏡翔實之學薄華語而不爲揜雅之材集方聞而益富辭源濟滫文陣縱橫今集中所存如考獵禍之訛著陳倉之辨證杜南蝕中之道疏昇原成國之渠以至酈炎書疏蔡邕碑誌莫不闡揚潛德刊削浮詞碑見洽聞切今轍古購孔文舉之集片言可敵班揚遊蕭穎士之門五尺羞稱曹陸其綴言之通博也如此嗟乎榮悴命也遇合時也擁鄭君之縹緗服曾子之緼繻帖書墨義大經雖通風簾棘闥屈聲屢振荆璞遭刖隋珠匿耀早年卓犖

卽馳令名中櫛寃天遂喪懿寶講義陰堂之奧委化知歸納書
寢室之楹望舉遽息吁可悲已德配李儒人夙守閨箴克彰婦
德善心爲窈含章可貞簪蒿杖藜爲偕隱之服拊茶茹藿甘食
貧之風先于某年卒以某月某日合葬于某原先生之少子旭
卽先生昔年與弟梅峯先生爲嗣者也乾隆乙卯科舉人今任
長安縣教諭恪遵庭誥不墜宗風捧抱遺文乞余表墓某備聆
穆行敢闕徽言刊化臺元石之文入魯國先賢之傳太邱懿範
宜書第二之碑江夏高風合擅無雙之譽

朱母張太恭人墓表

蓋聞易稱備德有四而節永于貞禮推熾行者六而孝冠乎首

是以樹烈兼砌比丹青而勿渝柔順無讐方椒蘭而逾馥
朝廷崇褒錫之典里鄒式聖善之型永終知徹世奉軌儀昭明
有融門標綽楔爲興門之母絕作青史之女宗如朱母張太恭
人者洵無愧矣太恭人茂苑高門清河華胄世有隱德家傳義
方太恭人預聞庭誥之遺能闡簾經之義閨壺所則善習柔儀
篇什兼陳惟取德象莊姝表其度淑慎著其規年十八歸贈公
竹庭先生堂雁修儀河飭飭詠香纓乍戴便卻鉛華竹筍自將
不矜珍麗持榮以約處嗇而安斯時也翁伯衰年威姑善病伯
嚮以居貧自樂德耀乃操作而前煩撝絺綌之衣滌濯椀饔之
器晨餐夕膳屈勉承顏簡米量鹽辛勤執爨良人課讀奉修脯

以致歡健婦持家惟織紵而代置竭閨中之婦職慰堂上之親
心三族觀型六姻承矩洎乎靈護霜隕淚灑憂雲慈竹風凋誠
枯孝水太恭人始則叩天籲禱繼則擗地呼號哀欲忘生毀幾
滅性嗣後籩供魚菽牖設蘋蘩舉念不忘踰時猶慟蓋三十餘
年如一日也贈公研窮六籍條貫百家勵苦志以冥搜抱高才
而蹇產楚璞屢獻莫剖連城燕骨不收終淹厯塊傷酈炎之淹
落憾趙嘉之厄屯體則苦其列裔業猶勤於瘁掌孝標貧悴復
染沈疴輔嗣清羸竟嬰瘵疾太恭人典鬻衣簪經營藥餌侍疾
兩載斯夕不懈贈公纒絛牀蓐終至不起龍蛇發讖遽占君子
之災鵬鶚摩霄竟負才人之志太恭人呼天咯血誓日椎心恨

欲磨筭身甘化石乃勉遵嚴命以撫遺孤僅一息之尚存痛百
身之莫贖曳麻衣之似雪坐蓐室以無言十指捋荼終年茹蘗
事翁以孝教子以嚴母也爲師特而兼怙折夔勉奇童之學掃
室理寡女之絲四壁秋風一銕霜夜灰留篆字篋啟楹書是以
王氏龍超買家彪怒或蜚聲于仕路或馳譽于文壇皆太恭人
之教也嗣君廷瑛官候補員外郎遵例加二級 誥封太恭人
廷璣援例授州司馬廷瑾廷琛皆能以儒業世其家太恭人勵
節垂三十年隣族臚列事實申請題奏奉 旨俞允給卹建坊
旌表 鳳誥旣膺 龍章繼賁過清節之里目以禮宗讀大家
之書垂爲女憲繼周篇而騰茂冠魯冊而飛華詢足傳淑問於

扶輿慰賢雄于泉壤矣嗚呼不朽者名大齊者壽悵顏光之易逝傷愛日之難留而彤管常昭清芬靡武廷瑛頰寒泉而沫泣望故隴而隕心感極蒿莪痛深茺蔚爰具累行之牘乞爲表墓之文前太恭人之歿也顧呈橋太守曾爲作傳敘次有法懿嫻備書茲復舉其犖犖大者貞石不磨賢墳足式辭慚綴玉芳馨永播于細緹字定生金湮沒不隨乎陵谷

外弟顧學和諫

并序

惟乾隆四十七年秋九月己亥外弟顧君學和以疾卒於伏羌縣舍春秋二十有六嗚呼哀哉余舅氏雙溪先生以名進士出宰楚南中年歿謝哲嗣四人君其仲子也伯歌季舞並峙英聲

三筆六詩咸承家學余方稚齒卽依外家垂髮齊年連茵接席
相知之深膠漆莫能喻也君蘊吐鳳之俊才表植鱗之雅度枏
榴賦就總角知名芍藥詞工琬車馳譽先君子器之以余妹字
瑞聯何劉之世親締潯陽之舊戚手足之誼在昔已深骨肉之
情自茲彌篤乾隆庚子余竊祿邊陲得伏羌令時太夫人板輿
西來君亦相從于官舍焉春華秋月佐我承顏夜燭晨鐙勗君
勤學聯牀聽雨蠟展登山補童年之墜歡破旅人之孤悶時或
親賓宴集觴酌流連蒲籥相娛竹肉間作君獨彬彬安雅不激
不隨所謂玉韻能和珠光無類方君標格殆近之矣伏羌舊有
朱圀書院辛丑春余延君主講席從遊者百有餘人君論史鑒

聖說經鏗鏗懸河俟酌洪鐘待扣問奇盈座益廣其咫聞還費
踵門無勞于影質青衿髦士組帶儒生無不仰其褒誘服其道
博焉君體素清羸端憂善病衛叔寶自憐身世祇解言愁慮前
祖早擅才華恐難久壽蟲號鳥歎詩欲成旃弔夢歌離文工作
識余心竊憂之未忍言也無何家書來妹一女殤君壻鄉漂泊
方對蓬轉以驚心子舍迢迢忽念杏殤而隕涕青蓮寄遠之句
最憶平陽陳思歎逝之辭偏哀金瓠鍾情過甚排悶無方時悅
悅若有亡獨怍怍其不樂膏肓之疾恨于此矣猶復疲精圖史
刻意縹緗鐵搗竹素無非咯血之由蠶粉芸煙盡是傷生之物
子雲才竭腸胃俱流李廣心勞精神先去欺魄之形漸槁殭殍

之病不斟長桑路遠莫致良醫元父地窮難求上藥雀藏覆斗
知思話之將亡鵬上承塵兆翼生之長逝嗚呼哀哉君雖當疾
革不改神清發篋理衣呼湯頰面蘇韶永訣恐旅櫬之難歸李
賀彌畱念阿嬈之已老嗚呼哀哉僧舍一棺家山萬里元夜表
思歸之夢異鄉留羈客之魂使爾棲棲呼余負負今則丹旄將
發靈輜欲行關路險巇風煙慘愴元伯喪歸死友誰爲范式荀
郎年少後事反託鍾君嗚呼哀哉痛矣孤嫠傷哉余妹堂前衰
白尙有慈親膝下悽涼並無弱息藥砧何在盼化鶴以歸來琴
軫長拋撫離鸞而慟絕雁行如故隻影疇依荆樹依然一枝獨
悴嗚呼哀哉某飄零羈宦契闊親知顛躓頻仍憂虞日積君復

棄我早世卽冥知音已逝獨何心於世緣後會無期悲莫深于
長別天高難問命也如何嗚呼哀哉乃作誄曰

憶在稚齡爰依外氏與君昆季共肄文史撫塵而遊聞音而喜
密契微言如石投水君方總角誕茂英標華敷巖桂穎發陵苕
偉節最怒阿龍自超甯隨驥尾詎作蜂腰舊戚新姻門楣有慶
延明奮衣太真納鏡共羨冰清無慚玉映骨肉情親彌敦愛敬
繫余竊祿奉檄隴頭輕軒迎養君亦來遊殊鄉握手情款綢繆
看花命酒嘯月登樓朱闌山前茅堂竹院捧手橫經諸生北面
茵菲緹紉耕耘筆硯循循善誘孜孜無倦仲宣體弱子建憂生
專精文藝銳意科名櫝中玉韞掌上珠傾羈愁莫釋旅病交并

營魄若亡形骸漸槁靈藥難求神巫莫禱黯黯夜泉悠悠宵昊
陸厥無年龔生竟天悲君屬續適值朔辰鐙昏月黑霜酸露辛
長懷故土永念慈親聞茲苦語疇不傷神僧舍數椽我館我殯
星灰一周倏不逾瞬送君歸里靈輦發輶絮酒淒涼關山阻峻
哀余弱妹邁此憫凶輕塵短夢斷雨零風長離泣鳳半死悲桐
天長地久銜恨何窮文契難忘音儀在目春雲等潤秋蘭同馥
君之淑懿宜膺多福弱齡隕逝神明何酷猶憶寒夜一鐙熒熒
子文我定我歌子聆聆君翔躍慰我飄零如何背世長卽淪冥
死別吞聲沈寃莫訴已已金骨嗟嗟玉樹此日分岐何年題墓
流慟斯文庶通幽路

署伏羌縣事香琳沈君誄

乾隆五十二年六月二十六日壬戌署伏羌縣事沈君卒嗚呼
哀哉乙巳之夏君奉檄來甘某得識君於蘭州旅舍比肩千里
列宰一同託高惠之神交歡均傾蓋歧夏侯之雅望契密連與
橘柚共岑澗澗合器奉袂論心恨相見之晚也君吳興令族東
陽遺胄世有隱德代產閭人其孝友醇深之行家庭雍穆之風
載在家乘者茲非所詳焉君生有奇徵幼稟靈質弱齡嗜學早
歲知名篆香千字悟本天成墨啜三升文同宿構書儒碩士共
稱爲國器焉嗣以故家中落壯歲薄遊千言則倚馬可成百函
則濡毫立就鄴下翹材獨推陳阮梁園上客雅重鄒枚固已賞

譽者傾衿招延者側席矣既遊京邑遂列賢書以三長之才備
四庫之選時與哲弟比部君昂高雙珥價重兼金爭傳傳毅蘭
臺令史之文其識徐堅鳳閣舍人之樣方擬凌雲奏賦豈日持
權乃登壇射策未躍陶邱之二龍入仕牽絲終絆平原之一驥
釋褐爲甘肅縣令非初志也遂乃驅車遠邁橐筆長征越禽代
馬常懷鄉土之思老樹遺臺時動登臨之感詞人作客篇什彌
工才士入官風流自遠矣乙巳冬某以薦擢入都大府檄君攝
伏羌令君撫循多術聽斷忘疲拔薤當門鞭絲縛柱清年餘之
牘一縣稱平上月計之書百城爲最某窺傳家之治譜聆輿人
之頌詞雖同湛于蒹蘭實增慙于糠粃矣君秉性剛急素疾媮

嫻時鳴琴以導和亦佩韋而示緩然而吏人有犯撫心每歛自
 撻風教未行掩閣長思已過悟養空之旨悲亦戕生師樂志之
 篇憂能損壽囚山賦作思越吟成崔駰出樂浪以長愁桓譚居
 六安而不樂塵勞已倦宿疾難斟洎某之再回伏羌也君之病
 已深矣猶復力疾傾襟披帷執手夜風燭燼晨雨衾寒死生有
 命達哉賈誼之言妻子何依淒絕張堪之託嗚呼哀哉膏明而
 銷翠羽而殃喪杞梓之良材兆瓊瑰之祇夢鍾期永逝傷心柱
 絕絃摧管輅無年瞑目男婚女嫁嗚呼哀哉關路正長嬌嬰在
 遠愴丹旄之將發悵素車之莫追艷獨行之傳我真有愧于巨
 卿刊第二之碑君或無慙于文範嗚呼哀哉乃作誄曰

渭水潏潏送君朱旛隴雲望望送君丹旄蘭山之南有城如斗
君來承乏與余先後惟君慈惠雅善撫循庭真有草飫或生塵
別君經春交君雨載我貧君念君言我佩重來握手君據匡牀
道睂長爪羸然以疋麥穗方歌桑生遽兆總帷寂颺素車爭弔
來兮何暮逝也溘焉傷此哲人胡不永年秋風飄颻歸裝蕭瑟
南郡無錢西陵有石熒熒孤嗣渺隔山河翔魂異域空懷薜蘿
文譽長存循聲不朽聊布哀悰用酬執友

金朗甫誄

元默紀年蕤賓旅月清故翰林庶吉士仁和金君朗甫以疾卒
于邸舍年僅二十有七嗚呼哀哉月沈朧輝花凋黽采是殲才

子實喪俊民若其才性都長風儀淵令知言九變敏逾陸生異
字千名富于朱育英辭壯思殫見洽聞識安釐家之古文緝顯
節陵之墜簡賦以高麗見奇詩以清工入妙狹襟單慧者莫測
其涯量也文戰屢捷巍科早登以通博之才與清英之選羅含
則胸吞彩鳳阮籍則手搏赤猿桐露槐烟之什老宿傾襟蘭臺
桂苑之篇名流衷橐方當分榮鳳掖被蔭鑾坡晝日濡毫凌雲
授簡何期時當大瘳景值週年墨翟逢王侯岡厄丙孽嚮欲騁
而驥驟之步中祖含香甫越而蘭茝之華蚤落幽局長閉昭途
永隔嚙其酷矣能不悲哉某年當疲暮迹尙飄浮公幹著論空
負經奇文舉屬詞多傷偏宕君顧癖同痴嗜密締心知味羹逾

時然糠永少時或逍遙閒夜徙倚涼雲魚鳥流連竹肉諧婉雖
春星墮杯曉露沾袖不自知其沈頓也隙駒不留濛陰遽戢埋
玉樹于重泉鬱青霞于修夜韓卿長逝論詩孰辨音初輔嗣云
亡談易誰知繫表嗚呼哀哉昔袁炳異才文通作傳孝若素交
潘岳著誄敢援斯義爲之詞曰

文星系絕光嶽精淪崑邱碎璧凌門落鱗溟漠始奮扶搖未申
曾不中壽喪此哲人翳惟哲人神姿夙悟篤嗜典墳殫精細索
麗藻風飛高辭河注耀羽丹山揚輝元圃館啟翹材名登上第
射策東堂讀書中秘于野博聞承天多藝行對三雍待成十意
方題朝籍遽執殤宮泣瓊兆夢巢鷺微凶朝薤晞露秋條迕風

行善遭命懷和告終疇昔交期忘形語默臭味風雲談諧翰墨
星晚露初鑑青月黑促坐論文微言相得舊歡已矣宿諾何追
壞陵絃斷山陽笛悲西樹長靡南雲易頽行行孤轉寂寂遺徽
嗚呼哀哉

湖南湘鄉縣丞吳君誄

夫義風振世秩何愧乎末班修名冠倫數何歉于中壽赤石不
奪獨守耿介之心沈檀甘焚不銷鬱烈之氣古來節士多出卑
官黃綬榮於龍藻銀佩美於垂棘如湘鄉縣丞吳君者信有徵
矣君諱英玉字玉泉蘇之常熟人也周章令族孰哉華胄代有
名德世非壙僚君生貢環姿幼秉琦行班管在手風雨蜚聲蓮

花插腰虹霓耀彩無如射策不售贖帖徒勞喟然曰丈夫處世
安能碌碌爲章句儒乎遂焚王壽之書擲逢萌之楯明習吏事
揣摩兵鈐以武功爵起家得楚南零陵尉拊循編戶矜恤羣人
有陸景備之真清行員半千之實惠三年書考以卓異聞時值
蛇巫不靖犬封構孽君勇氣慷慨雄心憤薄短後從軍之服高
前卻敵之冠宵眠砂磧笑看宛轉之刀曉渡冰河淨洗連錢之
馬餽餉無缺轉輸若神時嘉勇郡王總統戎律目元康爲快吏
上許歷之雋功特擢湘鄉丞君激揚自勵奮發敢爲密箐叢林
佻身獨往攬灰箭火舍命不渝受瘴癘之毒淫搜風霜之爪甲
積勞成疾閱日不甦按劒撫膺空餘裹革之志攬鏡照影知有

犯兵之欄隨總兵花連布移營冷風坳巨猾恣睢列營屠潰君
力疾抵抗斃于馬鞍山下嗚呼哀哉幕府愍君勞績奏牘上聞
詔贈國子監學錄 賜金祭葬從祀忠義祠賜以儒冠祀之
宗布槃瓠革面遂偃鯨臺之旌鴟鴞變音迺獻泮宮之馘君之
英靈可以慰矣夫誄以美終文由累行安仁操翰表汧城之功
延之綴辭昭滑臺之節式遵前典迺作誄曰

矯矯吳君古之節士徒抱高才而無貴仕低首風塵卑棲棘枳
誓命戎行不甘委靡壯氣飛揚龍阿知己實命不猶若擠而止
膏明則燬玉縝翻毀君之入仕不卑抱關一命之吏威惠克宣
山多義鳥地有廉泉三年報最輿論稱賢蠶繭苗頑挺災荆楚

鋒蝟斧螭公行呂鉅上將專征統茲勁旅君請鑒行枕戈負羽
蹶穿膝暴執獲搏虎不避阨危甯辭茹苦頭塵不浴衣焦不申
峙芻糗遂轉粟秦國馳驅盡瘁忠以忘身炎風委火蠻烟瘴雲
蛇涎吹蠱蜮沙中人遽嬰沈痼竟遭艱屯精魄銷亡壯心未已
磨盾作書據鞍爲几笳鼓翻營力疾而起深溪濶瀑危峯屢屢
攀藤附葛賊來如蟻被髮呼天慷慨赴死賁志以終沒而猶視
嗚呼哀哉熒熒孤嗣亦抱亮節隻身提劍萬里負骨脫命鯨牙
招魂馬鬣乞彼高文鐫此貞石 九重軫恤 殊恩祇承錫之
儒秩名德已升國殤往矣精靈有憑爲書素旗余言可徵

陸節母誄

夫四星炳符天垂須女之紀六德貽範地起榛娥之臺要惟錕
芳矩于佩彤體崇規于篆素從容陰禮婉婉柔則三心五噏長
懸替月之輝側調偏絃代譜將雛之曲故能葳縠書之付託峻
萋室之風規明哲之稱踵美前古蕃衍之福延光後來如陸節
母林太孺人者洵無愧焉節母諱某福建閩縣人學生林某之
女也靈根夙隕尙餘儒素之風疎宗亦凋惟傳方雅之族怙恃
偕亡合稱慙女孤寡相恤依于義姑淑問柔儀弱顏固植禮容
德象織紵組紃慧擅鍼神工推絲絕時陸補山先生爲連城令
正室高莊三孺人相繼歿聞節母賢納爲側室遂攝女君卽持
家政蘋蘩是芻牖下季蘭之尸饘飽聿修繼觚搏頰之祭寬利

足以容衆明敏足以辨物威姑道孝娟孟稱賢旣而蒲生吉兆
蘭茁祥徵墮任昉之旗鈴出高琳之玉磬生二子曰繼裴繼輅
先生厯任大邑擢陞同知節母皆隨任焉其飲廉泉不然官燭
洲無種橘舍有栽棠王遜捐駒時苗留犢胥藉賢媛之內助克
成君子之高名當先生之任百色同知也以隔省代追債項被
劾青蠅營棘赤臭播關無故吏之訟寃有胥人之抵隙訛言賊
聞事且不測節母焚香籲天願以身塞禱精誠所感瀕險獲全
先是高孺人所出之子某來省視歿于官舍先生旣落職令節
母挈棺詣省同歸中途舟破衆人惶急請節母登岸節母呼曰
當先移棺堅坐以待水波齊足凝神不驚濤瀾殷床撫棺弗去

旣而登陸舟沈一無所損非惟膽智之殊衆難其慈愛之感神也洎乎先生懸車闔里解紱林泉著錄之生若雲載酒之賓如市炊梁藟韭供神士之琚談倒屣傾筐副後堂之琴問康成通博徧授諸生之經絡秀賢明仍具卅人之饌浣牖滌器數米稱薪夜燭晨鋌不言勞瘁也旣而巢鵲徵凶訾蠶告咎竟發陰堂之讖空留緘篋之書庚子四月先生病卒時繼裴已夭繼輅年甫九齡節母誓日椎心呼天咯血勉留一息以撫遺孤惡筭露紵以終喪茹藥餐荼而志痛當倉卒之際戚儔有欲以四品服斂先生者節母以爲僭持不可正黔婁之會易于輿之簣又何禮教之嫻習精神之愜定耶繼輅年稍長文譽籍甚嘗客浙撫

阮公幕節母貽書戒之曰禮寡婦之子非有見焉弗與爲友何者父教無聞而母慈多誤爾當念此勉力自強勿爲人所棄阮公見其書嘖嘖稱賢母不置昔班昭作賦敬慎述魯論之篇章母傳經訓誠通曲臺之禮以今方古有同符矣初節母隨任順昌有以相術謁令君者謂節母年不越三十節母笑曰壽由人自致豈有定數哉至嘉慶十四年節母年七十有五預知亡日徧誡子婦沐浴更衣正容而逝其潛神內識靈襟默照達生者傀知命不惑求之巾幘豈易有其人者哉繼輅痛墓儀之劬勞感鳴鳩之平一備書穆行徧乞高文某締縞紵之素交託葭莩之世戚飫聞塞淵之化敢陳連遽之辭聊綴德子旂旒冀傳馨

于鍾萬其辭曰

柔惠成資幽貞植性令質瓊淑冲懷淵映海嶠清門閭鄉著姓
風實魯妃姑非鄭媵自歸鼎族內政能持慈流異腹嬾繼前規
相夫從宦備歷艱危其餐冰蘗不潤膏脂曼容解綬君山罷任
驚鸞鍛翮龍蛇發誠聖室心摧蒿廬口噤勉坊遺孤上承先蔭
熒熒孤嗣區沒深造說經紛綸媚學騰越登櫟或情折夔猶教
秀出土林倚聲清劬恕本如心福原積愛贈緇嚴寒分餐儉歲
時闕飢困不嫌丐貸姍戚嗟稱嫠嫠銜戴哀哉賢母胡不百年
落棠景仄黃竹悲遄幽宮永闕貞石長鐫清操栝栢令聞蓀莖

周淑姬哀辭

乾隆壬子歲周君鏡塘抱愛女之戚寓書於余示以詩什陳思
哀金瓠之辭樂天悼金鑾之作哀感悽豔動人心脾余悲夫花
隕春蕤月淪鼉采賦質何淑稟命不融震靈聚窟方無續命之
藥陰天紂絕路斷返魂之期況乎弱質易萎蕙叢已亡孤神永
傷奉倩亦逝尤生死之殊感骨肉之極艱矣泚筆和墨遂成哀
辭將以述逝者之懿嫻抒吾友之俊喟云爾辭曰

何斯人之婉孌兮毓秀質于闈房含蓼莪以承景兮結蕙若而
懷芳習陰臣之六禮兮嫺女誠之七章爰履順而蹈和兮洵金
昭而玉粹惟太沖之愛女兮憐纖素之明慧敢彤歛而捧手兮
弄斑管以掄袂偶鉞紆之閒暇兮儼綈帙之相對洎于歸於望

族兮嫵戚紛其有喜從魚媵之育育兮戴香纓之繩纒作三日
之羹湯兮潔中饋之滌灑威姑稱孝兮邱嫂推賢積勞成疾兮
鍼石難痊飛龍骨出兮熊失嫵妍雖殄殢而自力兮曾不形其
燕嬾猶嚴妝而視夜兮供椀籩之帖妥迺隨翁而違宦兮逐魚
軒于山左別姑姊而言邁兮淚瓊瑰而交墮同齊女之悲思兮
望吳山之駸駸處海壖之卑溼兮百沴劇以攻中竟形神之遽
離兮乘蓬島之回風遺絃在匣兮長簾牀空綠苔生闔兮永闕
綦蹤愴珠沈而香殄兮終莫慰乎賢雄旋弔夢以歌離兮倏悲
黃而悲綠嗟仲祖之無年兮痛韓卿之不祿詎隨唱于泉臺兮
皎雙飛之逸山秦簫月墜兮楚挽風淒青曾黃頰兮生滅難稽

何椿齡與蟒暑兮概百年之大齊庶令名之難朽兮冀靈光之不迷屑隄礙而陳辭兮揚馨馥于璇闥

公祭嘉勇福公文

惟靈紫嶽降神綠圖薦祉將相連華親賢濟美馬鄧扶輪韋平讓軌世德銘于鼎鐘家聲著于圖史篤生碩輔俾贊皇猷九宗五正四姓小侯陶子翊夏申伯佐周丹穴高而威鳳耀黃齒出而慶雲浮含香螭陞曳紱龍樓威儀峻整機鑿清邁盡地成圖洞知邊事橫鞭代算早預軍籌令則擁旄之歲仲華拜衮之年參謀武帳宣力戎旃瘴洗金沙之霧烽銷玉壘之煙介冑曾生蟣蝨堯鑒果出貂蟬殊恩疊被偉略遐宣太保公孤之

右司空岳牧之先典周廬之十二領宿衛之三千著英規于西
蜀作重鎮于南滇隴坂驛騷潢池蠢動祇聚蘭干之山寇煽花
門之種受命而六月鑿行誓衆而三軍曲踊耀彌龍蛟輶之威
率英璽金符之重枯貳貢於三危殪蚩尤於四冢塞境垆以夷
庚掃風塵之瀕洞遠邕皇威上承天寵侯封敕而帶礪山河
使節持而指揮關隴黃扇躋台輔之班紫塞執封疆之總蛾賊
方張鯨波忽賦投廟署于伏波統舟師而橫海露橈冒突蒼
鷹赤雀之航爆槩犀函馱水明光之鎧收王則以回軍縛孫恩
而獻凱帝曰欽哉績宜嘉乃桓圭輯五玉之華繡卷絢九章
之采龍編之左象郡之東地名丹粟俗近朱蒙受羈縻而請吏

隨琛贊以來同駟牙之獸向化歸邪之星耀空壤莫願陳于

北闕旌麾先拜夫上公俾象卉狼肱咸沾 聖澤雕題鑿齒共

識華風恩無遠而不懷戰無堅而不克雪山鷲嶺之區祇洹舍

衛之國繩行沙度之鄉鬼難風災之域拯象教之沈菑度修羅

之黑劫龍羆十重鞬盾一戟人著翅以背飛陣摩雲而架入黔

羸動而雷奔金累驅而石裂逾身毒萬仞之山抵挹婁九梯之

穴酋長膝行舛徒股栗願附編氓長爲屬國共仰德星齊呼生

佛捧半盞以趨蹌擊蒙排而感泣鑄金葉以輸誠牽玉象而歸

德歌騰鐵拔隊肅銀刀風和笳鼓雲護旗旄元戎奏凱上相還

朝懋賞則勛高百辟崇班則禮絕羣僚裴德林以七寶宴邱和

以九招泰階斯炳玉燭均調鎖鑰仍資夫寇準珪符再昇于韋
皋遂啟兩川之幕府旋馳六詔之征軺惟地巫之僻壤有大封
之愁族率醜類以譁張負元化之亭育肆扇梟風潛吹虺毒載
驅下瀨之師又樹中權之靈璣鏡當胸靈珠在握粃糠邱石之
符囊括谷籍之錄士氣飈騰軍鋒電速水赤厲劒風腥過鏃酋
望塵而鼠竄頑聞風而螳伏係徽纆而乞降請灰釘而就戮喜
吉語之頻傳荷聖恩之特渥班聯親懿榮加章服爵已冠於
公侯位更崇於令僕嗚呼不知者壽難言者命匪躬而不避險
艱盡瘁而惟思報稱既食少而事繁遂違和而傷性每當曳足
以臨戎猶欲攻心而決勝投目藥而不神禱三靈而罔應難招

岱岳之魂竟革壺頭之病捷書未達于星郵遺表遽聞於天
聽宜乎 帝眷優隆 宸衷愴惻輟朝而悼柳莊加紼而封丙
吉易名而宗布書勛庸器則司空列籍繪象丹青銘功金石起
冢發元甲之軍藉幹輳黃腸之室備 恩禮以無加感哀榮其
已極某等或位繼蕭規或身經孔鑄奉緒言于細席感深仁于
舊部悲卿月之易淪慟慈雲之不駐碑沈峴首之川星墮渭濱
之鴈觀文終之劍履想武侯之旗鼓降人勢面以吼號衛士椎
心而顧慕奉觴奠以長望仰蒼穹而莫訴儻騎氣之不遐式來
歆于椒醕

書七人聯句詩記後

右七人聯句詩記明儀部主事君謙先生之所著也先生雅負
高氣不耐俗氛摠幼輿蕭淡之懷抱子雲顛胸之病陳牒得讀
買舟欲歸時黃纓老人與趙栗夫諸君以賢達之素交惜江湖
之遠別搗尊話舊促坐論文勝流畢集同竹林之雅游今雨不
來異杜陵之秋述簪紱盈座間以菱荷之衣桂椒共岑參之竹
柏之韵情殷索偶交本忘年甯知仕隱遂分惟識風騷旨合遠
迹崇情弗可及已當斯時也天欲暮而秋生客入門而雨作庭
綠如洗林芳轉清抽蕉葉之箋酌蓮花之醞枯桐流澗對虛牖
以眠琴古石蒸雲就方池而滌硯速藻艷發雕談揆張情往興
來推襟送抱聯句則奇追韓孟倡和則雅匹王裴簷溜不歇而

吟情愈豪街鼓將沈而酒趣彌永可謂盡殫唐之態極酣嬉之
樂焉夫哀絲豪竹之娛饌玉炊金之宴珠履接席紅囊踏筵非
不羅水陸之珍奇鬪聲色之姚冶然而歡場易散情殊聚廬華
光不留忽若秉電誰復尋遺蹤於仿佛撫軼事而流連浩劫淨
塵古今同慨若茲之激揚羣雅照發沖襟詩諧鐘石之音人有
仙靈之氣逸韻宛在高風可思非所謂靈山一會儼然未散者
耶

濮陽策蹇圖跋

右圖余同年友李載圖先生攝令清豐時所作時有長垣疏濬
之役君熟太史河渠之書遂獨任焉奉大府之檄鬻河一枝先

役夫之勞舉錡萬柄相度危堰綫路或爭牛羊信宿野廬破屋
時見星月凡兩閱月始克竣事又值蠶潦洪集塗泥尺深官事
有程簡書可畏乘馬屢蹶策蹇遂行家公舍人時與爭席書司
曹佐不辨要章既環顧而相驚迴覽鏡而自笑作爲是圖紀于
役也昔襄陽人關寫席帽之影東坡過嶺留笠屐之圖雖寄託
之偶同實勞逸之不侔矣茲來握手同話舊遊銜深杯以敘心
尋陳迹而披卷賢勞勘暇知君非覺灞橋之詩愛博無成愧我
僅書唐肆之券

瘞老馬文

敝帷之仁昔人所稱況我與爾曾同死生甲辰之夏跣踵羣隴

賊多于蠡城小如斗涉波躍塹帶月登陴出入鋒刃交橫旌旗
慚余備弱不習于騎賴爾深穩險迺克濟尋途躑躅凝顙摧積
嚙齧齒長伏櫪嗚悲妥爾營魂高原齧草彌山誰知奇骨

芙蓉山館文鈔卷八畢